

摛藻堂四庫全書薈要

史部

欽定四庫全書薈要卷五千六百七十三

史部

宋史卷四十五

元中書右丞相總裁托克托等修

本紀第四十五

理宗五

景定元年春正月丙子詔獎賈似道功庚辰歲星熒惑  
合在尾壬辰詔知涪州趙彊聚糧不運餉兵士遂為北  
有己削一秩罰輕再削兩秩乙未潼川城仙侶山賈似

道言高達守鄂州城凡三月大元師北還二月丙午詔  
賈似道以緡錢三千萬犒師并示賞功之典己酉以高  
達為寧江軍承宣使右金吾衛上將軍賜緡錢五十萬  
呂文德賜緡錢百萬浙西良田百頃鄂州戰守將士賜  
緡錢三千萬王鑑孫虎臣蘇劉義等各官十轉高達遷  
湖北安撫副使知江陵府兼夔路策應使陳奕阮思聰  
並正任防禦使江西湖南帥司言大元兵破瑞州臨江  
軍城興國壽昌洪撫全永衡諸郡民皆被兵存者奔竄

它所甲寅詔臨江守臣陳元桂死節官五轉贈寶章閣  
待制與一子京官一子選人恩澤給繙錢十萬治葬立  
廟死所謚曰正節瑞州守臣陳昌世治郡雖有善政兵  
至民擁之以逃以棄城失守削三秩勒停乙卯詔孫虎  
臣和州防禦使張世傑以下十三人各官五轉立功將  
士並補兩官資賜銀絹庚申雨雹辛酉大元遣偏師自  
大理由廣南抵衡州向士璧會合劉雄飛逆戰於道俘  
民獲還者甚衆詔雄飛升保康軍承宣使餘轉官賜銀

錢賈似道賜金器千兩幣千匹命國子監主簿劉錫趣  
召赴闕向士璧遷兵部侍郎職任依舊呂文德高達陳  
奕等各賜金幣有差丙寅大元軍過分寧武寧二縣河  
湖砦都監權巡檢張興宗死之詔贈武翼郎官一子承  
信郎以緡錢三萬給其家湖南諸將溫和轉左武大夫  
帶行遙郡刺史李虎官三轉帶行閭門宣贊鄆進帶行  
復州團練使各賜銀絹旌其守禦之功三月戊辰朔日  
有食之庚午命夏貴兼黃壽策應使總舟師癸酉以橫

山之戰將士效節多死行陣總管張世雄沈彥雄陳喜  
秦安李孝信鄭俊李安國各贈十官資賜緡錢萬恤其  
家甲戌賞夏貴鴻宿州白鹿磯戰功遷福州觀察使職  
任仍舊將士推賞乙亥詔全岳水衡柳象瑞興國南康  
隆興江州臨江潭州諸縣經兵農民失業應開慶元年  
以前二稅盡除之癸未賈似道奏蘋草坪大戰進至黃  
州乙酉詔范文虎轉左武大夫環衛官黃州武定諸軍  
都統制張世傑環衛官職任依舊郢州統制張勝死於

漢陽戰陣贈官五轉官其子煥進武校尉丙戌賈似道  
言自鄂趨黃與北朝回軍相遇諸將用命捍禦詔孫虎  
臣范文虎張世傑以下各賜金帛夏四月戊戌朔侍御  
史沈炎疏吳潛過失以忠王之立人心所屬潛獨不然  
章汝鈞對館職策乞為濟邸立後潛樂聞其論授汝鈞  
正字奸謀叵測請速詔賈似道正位鼎軸詔朱熠戴慶  
柯輪日判事大政則共議以聞己亥賈似道表言夏貴  
等戰新生州進至白鹿磯皆身自督戰有功詔赴闕庚

予以王堅為侍衛步軍司都指揮使戊申以劉整知瀘  
州兼潼川安撫副使己酉楊州大火吳潛以觀文殿大  
學士提舉臨安府洞霄宮癸丑進賈似道少師依前右  
丞相兼樞密使進封衛國公朱摺知樞密院事兼參知  
政事饒虎臣參知政事戴慶炣同知樞密院事兼參知  
政事皮龍榮端明殿學士簽書樞密院使己未以夏貴  
為保康軍承宣使左金吾上將軍知淮安州兼淮東安  
撫副使京東招撫使賜金器幣溧陽田三十頃壬戌進

馬光祖資政殿大學士職任依舊癸亥以呂文德兼夔  
路策應使丙寅命馬光祖兼淮西總領財賦五月戊辰  
朔詔趙葵依舊少保兩淮宣撫使判揚州進封魯國公  
徐清叟觀文殿大學士知建寧府饒虎臣罷壬申李曾  
伯史岩之並落職解官曾伯坐嶺南閉城自守不能備  
禦岩之坐鄂州圍解大元兵已渡江北還然後出兵又  
命程芾任事以致敗績甲戌詔贈呂文信寧遠軍承宣  
使立廟賜額子師憲帶行閣職更與兩子承信郎輔周

和州防禦使錄其白鹿磯死事乙亥詔李虎馭軍無律  
貸命追奪竄鬱林州丁丑賜賈似道玉帶庚辰戴慶柯  
卒贈資政殿大學士壬午熒惑犯斗癸未以皮龍榮兼  
權參知政事沈炎端明殿學士同簽書樞密院事馬塈  
郢州都統制駐劄江陵府甲申祈雨戊子詔饒虎臣以  
資政殿學士提舉臨安府洞霄宮任便居住楊棟召赴  
闕壬辰以姚希得為敷文閣待制知慶元府兼沿海制  
置使乙未詔李庭芝起復秘閣修撰主管兩淮安撫制

置司公事兼知揚州六月丁酉朔夏貴奏淮安戰功庚子竄丁大全於南康軍壬寅詔立皇子忠王禩為皇太子賜字長源戊申王埜卒壬子賜李遇龍金帶陳奕帶御器械依舊鎮江駐劄御前諸軍都統制賜田三十項詔升巢縣為鎮巢軍甲寅楊棟葉夢鼎並太子詹事乙卯陳韡進一秩福建安撫使知福州徐清叟觀文殿學士知泉州秋七月丁卯朔皇太子入東宮行冊禮大赦壬申貴妃閻氏薨賜謚惠昭東南有星如太白丁亥命

皇太子昕朝侍立戊子上謂宰執曰北朝使來事體當  
議賈似道奏和出彼謀豈容一切輕徇儻以交鄰國之  
道來當令入見乙丑侍御史何夢然劾丁大全吳潛欺  
君無君之罪庚寅賈似道兼太子少師朱熠皮龍榮沈  
炎並兼賓客辛卯詔丁大全削三秩謫居南安軍吳潛  
奪觀文殿大學士罷祠削二秩謫居建昌軍癸巳詔舉  
孝廉八月壬寅以程元鳳為淮浙發運使判平江府己  
酉太陰犯填星詔皇太子受冊畢賈似道朱熠皮龍榮

沈炎各進一秩東宮官吏諸軍兵等官一轉餘皆推恩  
壬子與憲薨贈少師謚忠憲太白犯房壬戌李曾伯史  
岩之各削二秩甲子饒虎臣削二秩奪資政殿學士罷  
祠九月癸酉守瀘州劉整以功來上丁丑知漳州節制  
屯戍軍馬洪天錫言援例剏辟幹官一員報行軍機密  
文字奏可辛巳祀明堂大赦丙戌熒惑犯壁戊子李松  
壽犯淮安冬十月乙未朔詔申嚴邊防甲辰詔黨丁大  
全吳潛者臺諫其嚴覺察舉劾以聞當寘於罪以為同

惡相濟者之戒時似道專政臺諫何夢然孫附鳳桂錫  
孫劉應龍承順風指凡為似道所惡者無賢否皆斥帝  
弗悟其奸為下是詔戊申李松壽修南城詔趣淮閩調  
兵毀之壬子破李松壽兵於連水城下夷南城舊址乙  
卯有星自東北急流向太陰壬戌竄吳潛於潮州十一  
月丙寅詔內侍何時修削二秩永罷不敘洪燾知臨安  
府兼浙西安撫使壬午以中軍統制知簡州馬千權興  
州都統兼知合州戊子熒惑與填星順行太陰犯房十

二月甲午朔詔華亭奉宸莊其隸外廷助軍餉包恢敘復元官職知常州辛丑建陽縣嘉禾生一本十五穗詔改建陽為嘉禾縣甲寅呂文德上夔路戰功乙卯少師廬陵郡王思正薨謚簡惠印應雷直徽猷閣知江州主管江西安撫司公事節制蘄黃興國三郡庚申以監察御史桂錫孫言追寢全子才敘復之命

二年春正月癸亥朔詔監司率半歲具劾去贓吏之數來上視多寡為殿最行賞罰守臣助監司所不及以一

歲為殿最定賞罰本路州無所劾而臺諫論列則監司  
守臣皆以殿定罰有治狀廉聲者撫實以聞乙丑城安  
慶詔馬光祖進二秩丁丑命皇太子謁拜孔子於太學  
乙卯福建安撫使陳韡累疏請老詔進一秩守觀文殿  
學士致仕以董槐判福州福建安撫使乙酉詔封張栻  
為華陽伯呂祖謙開封伯從祀孔子廟庭二月丙申孫  
虎臣戰邳州全師而歸癸卯詔諸路監司申嚴偽會賞  
罰之令甲寅進封周國公主二月壬戌朔日有食之乙

亥故寧遠軍承宣使張祥都統制閻忠進以援蜀之功  
祥贈節度使忠進贈復州團練除恩澤外各更官一子  
承信郎賜緡錢二萬戊寅賈似道等上玉牒日歷會要  
經武要畧及孝宗光宗寧宗實錄詔似道皮龍榮朱熠  
沈炎各進三秩夏四月癸巳朔余思忠追毀出身文字  
除名勒停竄新州乙未以皮龍榮參知政事沈炎同知  
樞密院事兼權參知政事何夢然簽書樞密院事俞興  
保康軍承宣使四川安撫制置使丙申呂文德超授太

尉京湖安撫制置屯田使夔路策應使兼知鄂州李庭  
芝右文殿修撰樞密都承旨兩淮安撫制置副使知楊  
州己亥詔申嚴江防壬寅呂文德兼湖廣總領財賦乙  
巳馬天驥資政殿學士知福州福建安撫使呂文福帶  
御器械淮西安撫副使兼知廬州官一轉戊申馬光祖  
進觀文殿學士職任依舊乙卯竄吳潛於循州丙辰竄  
丁大全於貴州追削二秩丁巳楊鎮授左領軍衛將軍  
駙馬都尉高達知廬州淮西安撫副使五月癸亥賈似

道請祠祿詔不允庚午謝方叔敘復觀文殿大學士致仕戊寅以劉雄飛知夔州夔路安撫使乙酉王堅遷左金吾衛上將軍湖北安撫使兼知江陵府六月乙未詔霖雨為沴避殿減膳徹樂乙巳詔近畿水災安吉為甚亟講行荒政辛亥以范文虎為左領軍衛大將軍主管侍衛步軍司兼馬軍司秋七月甲子蜀帥俞興奏守瀘州劉整率所部兵北降由興構隙致變也至是興移檄討整卒未制置使蒲擇之坐密通蠻書叛賊羅顯詔竄

萬安軍太陰犯斗乙亥以厲文翁為資政殿學士沿海  
制置使知慶元府戊寅王惟忠家訟冤詔奪謝方叔合  
得恩數丁大全責授新州團練使貴州安置臺臣吳燧  
奪職罷祠陳大方胡大昌皆鐫官壬午陳韡卒贈少師  
謚忠肅丙戌吳潛責授化州團練使循州安置八月壬  
辰命韓宣兼常德辰沅澧靖五郡鎮撫使呂文德兼四  
川宣撫使范文虎以白鹿磯之功賞七官以五官轉行  
遙郡防禦使餘官給憑丁酉詔奪向士璧從官恩數窮

竟侵盜掩匿之罪時以兵退遣官會計邊費似道忌功  
欲以汚穢一時間臣士璧及趙葵史岩之杜庶皆責徵  
償信州謝枋得以趙葵檄給錢粟募民兵守禦至是自  
償萬緡壬寅蔡周國公主館於安濟橋乙巳以江萬里  
為端明殿學士同簽書樞密院事依執政恩數九月辛  
酉詔湖秀二郡水災守令其亟勸分監司申嚴荒政乙  
亥李庭芝言李松壽已遁大元使郝經久留真州帝趣  
與錫賚經之留謀出賈似道帝惑其言不悟蓋似道在

鄂時值我世祖皇帝歸正大位撤兵似道自詭有再造  
之功諱言歲幣及講和之事故不使經入見冬十月癸  
巳呂文德言已復瀘州外堡擬即對江壘石為城以示  
持久之計從之戊戌雷電甲申詔申獎賈似道鄂州之  
功丙午以何夢然同知樞密院事兼參知政事癸丑程  
元鳳授特進觀文殿大學士醴泉觀使兼侍讀甲寅皇  
太子擇配帝詔其母族全昭孫之女擇日入見寶祐中  
昭孫沒於王事全氏見上上曰爾父死可念對曰臣妾

父固可念淮湖百姓尤可念上曰即此語可母天下迨  
開慶丁大全用事以京尹顧畱女為議大全敗故有是  
命丙辰沈炎資政殿學士提舉臨安府洞霄宮任便居  
住十一月己未朔劉雄飛和州防禦使樞密副都承旨  
四川安撫制置副使兼知重慶府四川總領夔路轉運  
使庚申周國公主館成詔董宋臣李忠輔各官一轉甲  
戌資政殿學士致仕汝騰卒贈官四轉謚忠清安南國  
貢象二丁丑馬光祖提領戶部財用兼知臨安府浙西

安撫使下嫁周國公主於楊鎮已外以鎮為宜州觀察  
使賜玉帶尋升慶遠軍承宣使詔駙馬都尉楊鎮家合  
有賞典楊蕃孫官兩轉楊鐸楊鑑官一轉並直祕閣餘  
轉官進封有差癸未封全氏永嘉郡夫人十二月庚寅  
改竄蒲擇之於南康軍辛卯宰臣奏太子語臣等言近  
奉聖訓夫婦之道王化之基男女正位天地大義平日  
所講修身齊家之道當真履實踐勿為口耳之學請宣  
付史館永為世程法從之甲午以皮龍榮兼權知樞密

院事何夢然參知政事兼太子賓客馬光祖同知樞密  
院事兼太子賓客知臨安府己亥太陰犯五車壬寅江  
萬里依舊端明殿學士提舉臨安府洞霄宮任便居住  
癸卯冊永嘉郡夫人全氏為皇太子妃

三年春正月戊子朔詔申飭百官盡言詔量移丁大全  
吳潛黨人並永不錄用壬戌詔陳瑩等耆年奉祠宜示  
崇獎陳瑩端明殿學士林彬之寶章閣待制史季溫直  
華文閣丁仁直寶謨閣仍並予祠祿甲子福建路安撫

使馬天驥進資政殿大學士職任依舊乙丑詔諭西蜀  
郡縣等官已授遇闕母遙受虛批月日違期不赴丁卯  
以善諂嗣濮王戊辰周國公主進封周漢國公主庚午  
賜賈似道第宅於集芳園給緡錢百萬就建家廟甲戌  
詔權知梁山軍李鑑守城有功帶行閣門宣贊舍人就  
知梁山軍復瀘州改為江安軍呂文德進開府儀同三  
司二月丁亥朔臨安安吉嘉興屬邑水民溺死者衆詔  
守臣給櫓瘞之詔獎諭制置司其立功參贊將士進秩

升職犒給有差乃裕授檢校少保以皮龍榮為資政殿大學士知潭州湖南安撫使乙巳太陰入氐戊申詔省試中選士人覆試於御史臺為定制庚戌李璮以連海三城叛大元來歸獻山東郡縣詔改連水為安東州授璮保信寧武軍節度使督視京東河北等路軍馬齊郡王復其父李全官爵璮即松壽三月乙丑以孫附鳳為端明殿學士簽書樞密院事兼太子賓客辛未詔升海州東海縣為東海軍丁丑汪立信升直華文閣知江州

主管江西安撫司公事節制蘄黃興國三郡軍馬庚辰  
呂文福依舊職差知濠州兼淮西招撫使夏四月庚寅  
太白晝見庚子熒惑與歲星合在危甲辰有流星大如  
杯五月壬戌熒惑犯壁壘陣丙寅雨雹己巳詔廣西靜  
江屯田小試有效其邕欽宜融柳象潯諸州守臣任責  
措置經畧安撫以課殿最仍條具來上辛未馬光祖以  
病請祠詔知福州兼福建安撫使丁丑賜禮部進士方  
山京以下六百三十七人及第出身庚辰夏貴上蘄縣

戰功六月戊子詔李璮受圍給銀五萬兩下益都府犒  
師遣青陽夢炎率師援之庚寅以孫附鳳兼權參知政  
事楊棟端明殿學士同簽書樞密院事兼太子賓客壬  
辰吳潛沒於循州詔許歸葬己亥董槐乞致仕詔授特  
進戊申詔青陽夢炎援李璮不俟解圍輒提援兵南歸  
諭制置司劾之己酉有流星大如熒惑庚戌安南國王  
日叟上表乞世襲詔授檢校太師安南國王加食邑男  
威冕授靜海軍節度觀察處置使檢校太尉兼御史大

夫上柱國安南國王効忠順化功臣仍賜金帶器幣鞍  
馬癸丑詔應謫臣僚終於貶所者許令歸葬秋七月丙  
辰詔州縣官廩祿不時給者御史臺覺察或以他物折  
支計贓論罪壬戌董槐薨贈少師謚文清庚午周漢國  
公主薨賜謚端孝壬申江州都統聶世興調遣入蜀託  
疾憚行詔奪二秩押往京湖制司自效戊寅侍御史范  
純父言前四川制置使俞興妬功啟戎罷任鑄秩罰輕  
乞更褫奪以紓衆怒奏可辛巳詔重修吏部七司條法

癸未詔申嚴諸路郡縣苛取苗米之禁甲申夜有白氣  
亘天八月甲午海州石湫堰成詔知州張漢英帶行遙  
郡刺史馬步軍副總管帶行環衛官丁酉築蘄州城知  
州王益落階官正任高州刺史制置使汪立信上新城  
圖詔獎諭戊戌李璮兵敗為大元所誅事聞詔沿邊諸  
郡嚴邊防汪立信升直敷文閣主管沿江制置司公事  
知江州主管江西安撫司公事癸卯太陰犯昴乙巳沿  
江制置使姚希得進寶章閣學士職任依舊九月壬申

召陳奕赴樞密院稟議丙子有流星大如太白丁丑溫  
州布衣李元老讀書安貧不事科舉今已百四歲詔補  
迪功郎致仕本郡給奉閏九月甲申朔太白晝見丙戌  
流星透霞大如太白戊戌詔刑部長貳大理卿少卿歲  
終無評事可舉即舉在京三獄官庚子有流星大如太  
白丙午詔應知縣罪罷雖經赦毋注緊望關著為令戊  
申詔紹興府火給貸居民錢今及二載民貧可憫悉除  
勿徵冬十月乙卯詔蠲四川制總州縣鹽酒榷額已未

太陰犯歲星甲子以楊棟簽書樞密院事兼權參知政事兼太子賓客葉夢鼎端明殿學士同簽書樞密院事兼太子賓客丁卯呂文德言遣將校禦敵多逗遛不進且奏功失實具姓名上聞詔呂文煥王達趙真削兩秩馬堃王甫削一秩餘貶降有差太陰犯五車星庚午太白入氐甲戌歸化州卒從毅納土輸賦獻丁壯為王臣詔改歸化為來安州從毅進秩修武郎知州事令世襲丙子詔安豐六安縣升軍使十一月壬辰丁大全竄貴

州招游手立將校置弓矢舟楫縱僕隸淫虐軍民詔奪  
大全貴州團練使移置新州癸巳馬光祖乞祠祿詔提  
舉臨安府洞霄宮任便居住丙申徐清叟薨贈少師謚  
忠簡丁酉資陽砦主萬戶小哥及其子衆家奴叛來降  
詔小哥賜姓王名永堅補武翼大夫夔路副總管重慶  
府駐劄戊戌以夏貴知廬州淮西安撫副使丁未皇孫  
容州觀察使封資國公焯薨贈保靜軍節度使廣國公  
熒惑填星合在婁十二月辛巳呂文德累疏辭兼四川

宣撫詔仍兼四川策應使

四年春正月壬午朔詔侍從臺諫給舍卿監郎官以上及制總監司各舉所知不拘員限不如所舉行連坐法戊子林希逸言蒲陽布衣林亦之陳藻有道之士林公遇幼承父澤奉親不仕詔林亦之陳藻賜廸功郎林公遇元官上進贈一官詔董宋臣同提舉奉安符寶所仍奉祠祿己亥嚴州火丙午詔革詞訴改送之弊二月癸丑詔吳潛丁大全黨人遷謫已久遠者量移近者還本

貴並不復用丁大全溺死滕州詔許歸葬詔俞興往歲  
失陷瀘城更削一秩丁巳置官田所以劉良貴為提領  
陳訖為檢閱戊午日暉周匝乙亥呂文德浚築郢州常  
澧城池訖事詔獎之守臣韓宣轉遙郡承宣使蘇劉義  
吉州刺史三月丁亥以呂文德為寧武保康軍節度使  
職任依舊劉雄飛樞密都承旨四川安撫制置使兼知  
重慶府四川總領財賦夔路轉運使加授姚希得刑部  
尚書李庭芝兵部侍郎朱裸孫太府卿汪立信太府少

卿並依舊任壬辰太陽赤黃暉丁酉以王堅知和州兼管內安撫使呂思望知濠州兼淮西招撫使庚子以何夢然兼權知樞密院事丁未詔知寧國府趙汝楨推行經界不擾而辦職事修舉升直華文閣依舊任戊申忠州防禦使貴傑授福州觀察使夏四月乙卯太陰犯權星丙寅官田所言知嘉興縣段浚知宜興縣葉哲佐買公田不遵元制詔罷之戊辰太陽赤黃暉不匝五月庚寅太陰入氐丁酉婺州布衣何基建寧府布衣徐幾皆

得理學之傳詔各補廸功郎何基婺州教授兼麗澤書  
院山長徐幾建寧府教授兼建安書院山長戊戌四川  
制司言二月甲寅大兵攻嘉定城馬塈出戰禦之詔馬  
塈援夔遷延削一秩令以所轉四官理作敘復流星出  
自角宿距星六月壬子祈雨乙卯京城火丙辰詔饒虎  
臣敘復元官依舊提舉太平興國宮庚申詔平江江陰  
安吉嘉興常州鎮江六郡已買公田三百五十餘萬畝  
今秋成在邇其荆湖江西諸道仍舊和糴丙寅詔公田

竣事劉良貴官兩轉陳言廖邦傑洎六郡官進秩有差  
丁卯流星出自河鼓庚午宰執進玉牒日歷會要經武  
要畧及徽宗長編寧宗實錄詔賈似道以下官兩轉秋  
七月壬辰敕令所進寧宗以來寬恤詔令戊戌以董宋  
臣為入內內侍省押班八月甲寅董宋臣以病乞收回  
恩命請祠詔賜告五月乙卯流星出自天倉星九月甲  
申詔趙汝楨為太府少卿淮東總領財賦辛卯祀明堂  
大赦甲午以何夢然知樞密院事兼參知政事楊棟同

知樞密院事兼權參知政事葉夢鼎簽書樞密院事冬  
十月己未詔發緡錢百四十萬命浙西六郡置公田莊  
甲子命張珏興元府駐劄御前諸軍都統制兼知合州  
十一月己亥福州火十二月丁未朔詔皇太子宮講官  
詹事以下日輪一員辰入酉出專講讀備咨問以稱輔  
導之寶己未詔在京置窠柵私繫囚并非法獄具臺憲  
其嚴禁戢違者有刑辛未太白歲星順行

五年春正月丁丑朔詔崇經術考德行癸巳出奉宸庫

珠香象犀等貨下務塲貿易助收幣楮庚子太子右諭  
德湯漢三乞休致授秘閣修撰知福州福建安撫使二  
月壬戌流星出自畢甲子太陰犯房丁卯太陰犯斗辛  
未雨土三月辛巳王堅卒賜謚忠壯馬光祖依舊觀文  
殿學士沿江制置使知建康府江東安撫使行宮留守  
己丑日暉周匝夏四月丙午詔管景模妻孥陷沒效忠  
愈堅平時所得奉入率以撫恤將士遂至空乏特賜緡  
錢三十萬尋賜金帶丁未以夏貴為樞密都承旨四川

安撫制置使兼知重慶府四川總領夔路轉運使辛亥  
詔郡邑行鄉飲酒禮癸丑太陰入太微垣乙卯信陽軍  
將領余元友等提兵防護春耕有功補轉兩官資戊午  
太白晝見乙丑何夢然馬天驥以臺臣劾罷己巳江萬  
里以資政殿學士知建寧府李曾伯以觀文殿學士知  
慶元府沿海制置使庚午太白歲星合於婁五月庚辰  
何夢然以資政殿大學士知建寧府辛卯以楊棟參知  
政事葉夢鼎同知樞密院事兼權參知政事姚希得端

明殿學士同簽書樞密院事馬天驥提舉洞霄宮甲午  
流星出自河鼓大如太白乙未安南國奉表謝恩進方  
物詔却之仍賜金帛以獎恭順己亥太白經天晝見六  
月甲辰朔知衢州謝暨因寇焚掠常山縣棄城遁詔削  
三秩褫職不敘臺臣言衢州詹沔之變乃謝暨任都吏  
徐信竒取激之暨罪重罰輕詔斬信籍其家暨再削兩  
秩勒停丁未詔饒虎臣敘復資政殿學士依前通奉大  
夫差遣如故甲寅加授李庭芝寶章閣直學士依舊任

朱祺孫右文殿修撰知靜江府廣西經畧使汪立信祕  
閣修撰樞密副都承旨沿江制置副使兼知江州江西  
安撫使詔呂文德職事修舉與官一轉太陰犯心戊午  
祈雨太白犯天關星乙丑命董宋臣兼主管御前馬院  
御前酒庫戊辰熒惑歲星並行己巳太白太陰並行入  
井庚午太陽赤黃暉秋七月甲戌彗星出柳丁丑詔避  
殿減膳應中外臣僚許直言朝政闕失已卯流星出自  
右攝提星彗星退於鬼辛巳彗星退於井甲戌京城大

火癸巳謝奕昌卒贈少保追封臨海郡王謚莊憲甲午  
填星守畢乙未馬天驥以臺臣劾其貪贓奪職罷祠其  
子時祿削一秩罷新任丙申知嘉定府洪濤言新繁縣  
御容殿前枯木再榮殿有畫太祖像又順化人楊嗣光  
等奉太宗真宗仁宗英宗神宗像來歸令櫝藏府中天  
府觀詔本府選差武臣迎奉赴行在所嗣光補武階兩  
資祈雨臺臣言太子賓客楊棟指彗為蚩尤旗欺天罔  
君詔棟罷職予祠戊戌彗星退於參八月壬寅朔熒惑

與填星合丙午以楊棟知建寧府戊午彗星消伏甲子  
彗星復見於參辛未彗星化為霞氣九月己丑日生格  
氣癸巳內侍李忠輔以臺臣劾其貪肆欺罔削兩秩放  
罷乙未建寧府教授謝枋得校文宣城及建康漕闈發  
策十餘問言權奸誤國趙氏必亡左司諫舒有開劾其  
怨望謗大不敬竄興國軍冬十月丙午太陰犯斗辛  
亥詔十七界會浸輕並以十八界會易之限一月止乙  
丑詔行關子銅錢法每百作七十七文足以一準十八

界會之三帝有疾不視朝丙寅大赦丁卯帝崩遺詔皇太子繼即皇帝位咸淳元年三月甲申葬於會稽之永穆陵二年十二月丙戌謚曰建道備德大功復興烈文仁武聖明安孝皇帝廟號理宗

贊曰理宗享國久長與仁宗同然仁宗之世賢相繼理宗四十年之間若李宗勉崔與之吳潛之賢皆弗究於用而史彌遠丁大全賈似道竊弄威福與相始終治效之不及慶歷嘉祐宜也蔡州之役幸依大朝以定夾

攻之策及函守緒遺骨俘宰臣天綱歸獻廟社亦可以  
刷會稽之耻復齊襄之讐矣顧乃貪地棄盟入洛之師  
事釁隨起兵連禍結境土日蹙郝經來使似道諱言其  
納幣請和蒙蔽抑塞拘留不報自速滅亡吁可惜哉由  
其中年嗜慾既多怠於政事權移奸臣經筵性命之講  
徒資虛談固無益也雖然宋嘉定以來正邪貿亂國是  
靡定自帝繼統首黜王安石孔廟從祀升濂洛九儒表  
章朱熹四書不變士習視前朝奸黨之碑偽學之禁豈

不大有徑庭也哉身當季運弗獲大效後世有以理學復古帝王之治者考論匡直輔翼之功實自帝始焉廟號曰理其殆庶乎

宋史卷四十五


謹案卷四十四第四頁前八行皇子祿進封忠王

刊本祿訛祺據度宗本紀改

第六頁後一行洪天錫劾內官盧允升刊本訛  
叔據洪天錫傳及宋史新編改

第九頁後六行監察御史朱熠刊本朱訛先據列  
傳改





總校官庶吉士臣張能照  
校對官庶吉士臣嚴福

謄錄監生臣彭希韓

欽定四庫全書叢要

史部

宋史卷四十六

七

詳校官編修臣王天祿



欽定四庫全書

薈要卷五千六百七十四

史部

宋史卷四十六

元中書右丞相總裁托克托等修

本紀第四十六

度宗

度宗端文明武景孝皇帝諱祺太祖十一世孫父嗣榮  
王與芮理宗母弟也嘉熙四年四月九日生於紹興府  
榮郎初榮文恭王夫人全氏夢神言帝命汝孫然非汝

家所有嗣榮王夫人錢氏夢日光照東室是夕齊國夫人黃氏亦夢神人采衣擁一龍納懷中已而有娠及生室有赤光資識內慧七歲始言言必合度理宗奇之及在位歲久無子乃屬意託神器焉淳祐六年十月己丑賜名孟啓以皇姪授貴州刺史入內小學七年正月乙卯授宜州觀察使就王邸訓習九年正月乙巳授慶遠軍節度使封益國公十一年正月壬戌改賜名孜進封建安郡王寶祐元年正月庚辰詔立為皇子改賜今名

癸未授崇慶軍節度使開府儀同三司進封永嘉郡王  
二年七月以宗正少卿蔡抗兼翊善時資善堂初建理  
宗制堂記書以賜王十月癸酉進封忠王十一月壬寅  
加元服賜字邦壽五年十月庚子授鎮南遂安軍節度  
使景定元年六月壬寅立為皇太子賜字長源命楊棟  
葉夢鼎為太子詹事七月丁卯太子入東宮癸未行冊  
禮時理宗家教甚嚴雞初鳴問安再鳴回宮三鳴往會  
議所參決庶事退入講堂講官講經次講史終日手不

釋卷將晡復至榻前起居率為常理宗問今日講何經答之是則賜坐賜茶否則為之反覆剖晰又不通則繼以怒明日須更覆講二年正月丁丑謁孔子於太學請以張栻呂祖謙列從祀十二月癸卯冊永嘉郡夫人全氏為皇太子妃五年十月丁卯理宗崩受遺詔太子即皇帝位戊辰尊皇后謝氏曰皇太后生日為壽崇節庚午宰執文武百官詣祥曦殿表請聽政不允宰未大赦十一月壬申宰執以下日表請視朝不允丁丑凡七表

始從丙戌帝初聽政御後殿命馬廷鸞留夢炎兼侍讀  
李伯玉陳宗禮范東叟兼侍講何基徐幾兼崇政殿說  
書詔求直言又詔先朝舊臣趙葵謝方叔程元鳳馬光  
祖李曾伯各上言以匡不逮召江萬里王爚洪天錫湯  
漢等赴闕詔躬行三年喪復濟王竑元贈少師節度使  
追封鎮王謚昭肅有司討論墳制增修之加封嗣榮王  
與芮武康寧江軍節度使依前太師判宗正事詔撫勞  
邊防將士監察御史劾宦官李忠輔何舜卿等贓罪並

竄遠方戊戌詔儒臣日侍經筵輔臣觀講乙未命洪天  
錫以侍御史兼侍讀十二月辛丑詔改明年為咸淳元  
年行銅錢關子率貫以七百七十文足壬寅戒職吏絕  
貢羨餘甲辰詔以生日為乾會節初開經筵講殿以熙  
明為名禮部尚書馬廷鸞進讀大學衍義序陳心法之  
要是歲兩浙江東西湖南北廣東西福建成都京西潼  
川夔利路戶五百六十九萬六千九百八十九口一千  
三百二萬六千五百三十二大理寺奏大辟三十三人

咸淳元年春正月辛未朔日有食之丞相賈似道請為  
總護山陵使不允尋下詔獎諭癸酉直學士院留夢炎  
疏留似道甲戌諫議大夫朱貔孫等亦請改命不報詔  
臨安免征商三月丙子京湖制置使呂文德辭免不允  
二月庚申置籍中書記諫官御史言事歲終以考成績  
三月癸酉似道乞解機政不允壬午京湖制司勅招鎮  
邊軍甲申葬理宗於永穆陵夏四月壬寅賞四川都統  
管萬壽雲頂山金堂峽之功及其將士丁未壽崇節免

徵臨安官私房僦地錢戊申乾會節如上免徵再免在京征商三月自是祥慶災異寒暑皆免戊午賈似道特授太師己未幸景靈宮發米八萬石贍京城民夔路都統王勝以李市沙平之戰獲功轉官兩資將士効力者上其名推賞五月己巳追命史彌遠為公忠翊運定策元祐閏月乙巳久雨京城減直糶米三萬石自是米價高即發廩平糶以為常丁未發錢二十萬贍在京小民錢二十萬賜殿步馬司軍人錢二萬三千賜宿衛自是

行慶恤災或遇霪雨雪寒咸賜如上數以江萬里參知  
政事王爚同知樞密院事權參知政事馬廷鸞端明殿  
學士簽書樞密院事丁巳以錢三十萬命臨安府通變  
平物賈丁卯故成都馬步軍總管張順歿於王事詔特  
贈官五轉其子與八官恩澤六月乙酉名理宗御製之  
閣曰顯文置學士直學士待制直閣等官戊子沿海制  
置使葉夢鼎三辭免不允己丑名理宗原廟殿曰章熙  
秋七月丁酉太白晝見初命迪功郎鄧道為韶州相江

書院山長主祀先儒周惇頤壬寅參知政事江萬里乞歸田里不允戊申夔路安撫徐宗武城開達石城乞推恩從之壬戌督州縣嚴錢法禁民間用牌帖癸亥以諒陰命宰執類試阮登炳以下依廷試例出身禁在京置窠柵私繫囚八月庚辰命陳奕沿江按閱軍防賜錢二十萬給用丁亥詔有司收民田租或倍克無藝監司其嚴禁戢違禁者有刑甲午大元元帥阿珠帥大軍至廬州及安慶諸路統制范勝統領張林正將高興副將孟

興逆戰沒於陣詔勝等各官其一子進勇副尉九月己酉以洪天錫為工部侍郎兼侍讀壬子命宰執訪司馬光蘇軾朱熹後人賢者能者各上其名錄用發母呂文德言京湖制帥策應三司官屬乞推恩詔各進一秩庚申吏部侍郎李常上七事曰崇廉耻嚴鄉舉擇守令黜貪汚讞疑獄任儒師修役法冬十月壬申減四川州縣鹽酒課始自景定四年正月一日再免徵三年乙亥減田契稅錢什四庚辰江安州潼川安撫司以攻懷簡小

富岩戰圖來上詔優答以賞十一月乙未兄少保保寧軍節度使致仕乃裕薨贈少傅追封臨川郡王

二年春正月癸丑江萬里四請歸田乞祠祿不允以為湖南安撫使兼知潭州二月己巳侍講范東叟奏正心之要有三曰進德曰立政曰事天嘉納焉戊寅詔免湖南漕司積年運上峽米耗折逋直率卽詔左右史循舊制立侍御坐前三月庚子賞夔路總管張喜等防護開達軍功將士進官有差乙巳詔郡守兩年為任方別

授官戊申賜勅書獎諭呂文德夏四月乙丑洪天錫三  
請祠不允以顯文閣待制知潭州兼湖南安撫使甲申  
侍御史程元岳上言帝王致壽之道在修德後世休邪  
說以求之往轍可鑒修德之目有三曰清心曰寡欲曰  
崇儉皆致壽之原上嘉納之丁亥授信州布衣徐直方  
史館編校五月癸丑詔諸節制將帥討軍寶節浮費毋  
占役兵士致妨訓練六月丁丑給羅鬼國化州印壬午  
以衢州饑命守令勸分諸藩邸發廩助之秋七月壬辰

祈雨詔以來年正月一日郊壬寅禮部侍郎李伯玉言人材貴乎善養不貴速成請罷童子科息奔競以保幼稚良心詔自咸淳三年為始罷之八月甲申安南國遣使賀登位獻方物九月丙辰浙西安撫使李芾以臺臣黃萬石等言削兩秩免冬十一月辛丑兩淮制置使李庭芝立城屯駐武銳一軍以工役費用及圖來上詔獎勞之己卯少師致仕趙葵薨贈太傅賜謚忠靖丁巳利東安撫使知合州張珏調統制史焰監軍王世昌等復

廣安大梁城詔推爵賞有差十二月丁丑申嚴戢貪之  
令甲申以請先帝謚祭告天地宗廟社稷丙戌奉冊寶  
請於南郊上謚曰建道備德大功復興烈文仁武聖明  
安孝皇帝廟號理宗大理寺奏歲終大辟三十五人

三年春正月己丑朔郊大赦丁酉奉皇太后寶上尊號  
曰壽和寧母壽和太后冊寶禮成謝堂等二十七人各  
進一秩高平郡夫人謝氏等二十二人各進封特封有  
差癸卯冊命妃全氏為皇后戊申帝詣太學謁孔子行

舍菜禮以顏淵曾參孔伋孟軻配享嶺孫師升十哲邵  
雍司馬光升列從祀雍封新安伯禮部尚書陳宗禮國  
子祭酒陳宜中進讀中庸己酉執經官宗禮講經官宜  
中各進一秩宜中賜紫章服太學武學宗學國子學宗  
正等官若醫官監書庫門庖等各進一秩諸齋長諭及  
起居學生推恩有差乙卯壽和太后親屬謝奕修郭自  
中黃興在等二十八人各升補一秩二月己未克復廣  
安軍詔改為寧西軍庚申馬光祖再乞致仕不允乙丑

詔賈似道太師平章軍國重事一月三赴經筵三日一  
朝治事都堂丙子樞密院言知夔州夔路安撫徐宗武  
初立臥龍山堡圍詔宗武帶行遙郡團練使以旌其勞  
三月癸卯知房州李鑑及將校杜汝隆夏喜以戰龍光  
砦有功優與旌賞夏四月庚申壽和太后兩次冊寶族  
兄弟謝奕實等十五人族姪謝在達等四十七人族姪  
孫謝鏞等十四人各賜銀十兩帛十疋詔大中大夫全  
清夫儒科發身懇陳換班靖退可尚特授清遠軍承宣

使提舉佑神觀仍奉朝請乙酉張珏護合州春耕戰歟  
龍溪以狀言功詔趣上立功將士姓名五月丁亥朔日  
有食之戊申詔曰比常命有司按月給百官奉惟官愈  
卑去民愈親仍聞過期弗予是吏奉吾命不虔也諸路  
監司其嚴糾劾六月壬戌加授呂文德少傅馬光祖參  
知政事李庭芝兵部尚書並職任仍舊皇后受冊推恩  
弟金清夫以下十五人官一轉全必櫬以下十七人補  
承信郎癸酉美人楊氏進封淑妃戊寅詔榮王族姻與

菜等三十四人各轉官有差秋七月丁亥張珏授正任  
團練使帶行左領軍衛大將軍賜金帶壬辰樞密院言  
右武大夫權郢州都統汪政郢城戰禦又焚光化城外  
積聚及攻真陽城皆有功該轉十二官詔轉橫行遙郡  
甲午四川都統督萬壽調統制趙寶楊立等率舟師護  
糧達渠城以功推賞己酉權黎州張午招諭大青羌主  
歸義乞用兩林西蕃榆林仍賜予加優從之八月辛酉  
遣步帥陳奕率馬軍舟師巡邏江防壬戌邊報警急詔

諭呂文德等申嚴防遏乙丑太師武康寧江軍節度使  
判大宗正事嗣榮王與芮進封福王主榮王祀事壬申  
久雨命在京三獄赤縣道司僉廳擇官審決獄訟毋滯  
九月乙未詔郡縣折收民田租毋厚直取贏違者論罪  
癸卯知邕州總統譚淵李旺周勝等繇特磨行大理界  
率兵攻建水州禽其知州阿孱以下三百餘人獲馬二  
百餘疋穀米器甲廬舍師還論功各轉官三資軍校補  
轉有差冬十月庚申復開州賜四川策應司錢百萬勞

軍甲戌大雷電十一月丙申故左丞相吳潛追復光祿大夫壬寅賞知房州李鑑調遣路將夏喜統領馮興等均州武陽場戰功十二月丙辰呂文煥依舊帶行御器械改知襄陽府兼京西安撫副使丁卯臺臣言叙復元官觀文殿學士提舉洞霄宮皮龍榮貪私傾險嘗朋附丁大全乞寢新命詔予祠祿

四年春正月癸未賜呂師夔紫章服金帶己丑呂文德言知襄陽府兼京西安撫副使呂文煥荆郢都統制唐

永堅蠟書報白河口萬山鹿門山北師興築城堡檄知  
郢州翟貴兩淮都統張世傑申嚴備禦癸巳故守合州  
王堅賜廟額曰報忠癸卯沔州駐劄潼川安撫副使督  
萬壽特升右武大夫帶行左驍衛大將軍賜金帶己酉  
印應雷改知慶元府兼沿海制置使庚戌詔曰邇年近  
臣無謂引去以為高勉留再三弗近益遠往往相尚不知其非義也亦由一二大臣嘗勇去以為衆望相踵至今孟子於齊王不遇故去是未嘗有君臣之情也然猶

三宿出晝庶幾改之儒者家法無亦取此乎朕於諸賢  
允謂無負其弗高尚使人疑於負朕閏月庚午賜夏貴  
金帶夏四月壬午湯漢三辭免刑部侍郎福建安撫使  
庚寅乾會節帝御紫宸殿羣臣稱賀上曰謝方叔託名  
進香擅進金器諸物且以先帝手澤每繫之跋率多包  
藏至以先帝行事為已功殊失大臣體宜鐫一秩於是  
盧鉞等相繼論列方叔昨蜀廣敗事誤國殄民今又違  
制擅進削一秩罰輕詔削四秩奪觀文殿大學士惠國

公罷宰臣恩數仍追寶金錄并繫跋真本來上丙申右正言黃鏞言今守邊急務非兵農合一不可一曰屯田二曰民兵川蜀屯田為先民兵次之淮襄民兵為先屯田次之此足食足兵良策也不報丁酉詔故修武郎姚濟死節立廟賜額曰忠壯五月辛酉樞密都承旨高達再辭侍衛都虞候乞歸田里命孫虎臣代之壬申賜陳文龍以下六百六十四人進士及第出身丙子賈似道乞骸骨不允六月辛巳葉夢鼎再乞歸田里不允詔罷

浙西諸州公田莊官募民自耕輸租租減什三毋私相  
易田違制以盜賣官田論秋七月戊午有星出氐宿西  
北急流入騎官星沒己未淑妃楊氏親屬楊幼節以下  
百三十四人推恩進秩八月壬寅奉安寧宗寶錄理宗  
寶錄御集日歷會要玉牒經武要略咸淳日歷玉牒賈  
似道葉夢鼎馬廷鸞各補轉兩官諸局官若吏推恩有  
差九月癸未太白晝見大元兵築白河城始圍襄樊冬  
十月戊寅朔日有食之子憲生參知政事常挺六乞歸

田里詔予郡已亥已減四川州縣鹽酒課詔自咸淳四年始再免徵三年十一月癸丑樞密院言南平紹慶六郡鎮撫使韓宣城渝嘉開達常武諸州有勞繇峽州至江陵水陸措置盡瘁以死宜視沒於王事加恩詔宣守本官致仕任一子承節郎仍贈正任承宣使丁巳詔知江陵府陳奕裨將周全王德等戰西山南谷口田家山有功各以等第推賞戊午子鋒生丙寅福建安撫使湯漢再辭免乞祠祿詔別授職辛未以文武官在選困於

部吏隆寒旅瑣可閔詔吏部長貳郎官日趣銓注小有  
未備特與放行違者有刑自是隆寒盛暑申嚴誠飭常  
挺卒贈少保壬申行義役法十二月宰外以夏貴為沿  
江制置副使兼知黃州癸巳史館狀理宗實錄接續起  
修張九成孫象先力學飭行不墜家聲其免一解示表  
厲命建康府建南軒書院祠先儒張栻戊戌汪立信知  
潭州兼湖南安撫使職任依舊乙巳詔賞京湖總管張  
喜趙萬等石門坂堰戰功

五年春正月丁未以李庭芝為兩淮安撫制置大使兼  
知揚州壬子京湖策應司參謀呼延德領諸將張喜等  
遇北兵戰於蠻河發死葉夢鼎累章請老留之固辭依  
前少保判福州福建安撫使封信國公以馬廷鸞參知  
政事兼同知樞密院事甲戌以江萬里參知政事二月  
戊子江萬里辭免參知政事不允三月丙午北帥阿术  
自白河以兵圍樊城甲寅葉夢鼎辭免判福州福建安  
撫使詔不允乙卯皇后歸寧族姻推恩保信軍節度使

全清夫以下五十六人各進一秩咸安郡夫人全氏以下三十二人各特封有差大元兵城鹿門已未詔浙西六郡公田設官督租有差辛酉京湖都統張世傑率馬步舟師援襄樊戰於赤灘圍戊辰以江萬里為左丞相馬廷鸞為右丞相兼樞密使己巳以馬光祖知樞密院事兼參知政事吳革沿江制置使夏四月丙子賞張世傑戰功辛巳江萬里馬廷鸞辭免詔不允壬午知渠州張資上蓬州界白土神山蒲渡等處今年春戰功丙戌

以安西都統張朝寶利東路安撫張玆領兵護錢粟餉寧西軍還至水磧頭戰有功詔推賞已丑劉雄飛依舊樞密都承旨知沅州兼常德澧辰沅靖五郡鎮撫使癸巳李庭芝特進一秩高郵縣夏世賢七世義居詔署其門五月己酉馬光祖依舊觀文殿學士提舉洞霄宮乙卯程元鳳薨贈少師庚申有星自斗宿距星東北急流向牛宿至濁沒壬戌詔信陽諸將婁安邦朱興戰千石坂呂文煥呼延德戰福山楊青李忠戰石湫俱有勞效

推賞有差壬申京湖制司言故夔路安撫徐宗武沒於  
王事乞優加贈恤詔致仕恩外特官其一子承節郎六  
月庚辰以呂文福為復州團練使知濠州兼淮西安撫  
副使甲申皇子是生辛卯家鉉翁辭免新命詔別授職  
庚子李庭芝辭免兼淮東提舉不允秋七月己酉觀文  
殿學士馬光祖乞守本官致仕詔允所請庚申祈雨壬  
戌東南有星自河鼓距星西北急流至濁沒八月戊寅  
詔郡縣收民田租毋巧計取贏毋厚直折納轉運司申

嚴按勅詔襄樊將士戰禦宣力以錢二百萬犒師趣上  
其立功姓名補轉官資九月丙午祈晴辛酉祀明堂大  
赦丙寅明堂禮成加上壽和聖福皇太后尊號冊寶太  
師判大宗正事福王主榮王祀事與苟加食邑一千戶  
冬十月甲申子憲授檢校太尉武安軍節度使封益國  
公己丑呂文德進封崇國公加食邑七百戶以湯漢為  
顯文閣直學士提舉玉隆萬壽宮兼象山書院山長十  
一月戊辰少傅文德乞致仕詔特授少師進封衛國公

依所請致仕十二月癸酉文德卒贈太傅賜謚武忠已  
郊以范文虎為殿前副都指揮使壽和聖福皇太后尊  
號冊寶禮成姪謝堂姪孫光孫等二十八人各轉一官  
餘姻推恩有差甲申以錢二百萬命京湖帥臣給犒襄  
郢等處水陸戍士戊子詔安南國王父陳日叟國王陳  
威冕並加食邑一千戶大元兵築南新城

六年春正月壬寅以李庭芝為京湖安撫制置使兼夔  
路策應使印應雷兩淮安撫制置使己酉以錢二百萬

賜夔路策應司備禦賞給庚戌以高達為湖北安撫使  
知鄆州孫虎臣起復淮東安撫副使知淮安州辛酉行  
成天歷丁卯上製字民牧民二訓以戒百官戊辰以江  
萬里為福建安撫使二月辛未檢校少保安德軍節度  
使與菜加食邑五百戶丁亥陳宜中經筵進講春秋終  
篇賜象簡金御仙花帶鞍馬丁酉以呂文福為淮西安  
撫副使兼知廬州己亥朱襍孫權兵部尚書仍四川安  
撫制置總領夔路轉運知重慶府三月庚子朔日有食

之癸丑詔曰吏以廉稱自古有之今絕不聞豈不自章顯而壅於上聞歟其令侍從御監郎官各舉廉吏將顯擢焉癸亥詔賴吉南安境數被寇雖有砦卒寇出沒無時莫能相救宜即要衝立四砦砦屯兵百使地勢聯絡禦寇為便從三郡擇將官領之夏四月戊寅以文天祥兼崇政殿說書五月辛丑以吳草為沿江制置宣撫使六月庚午詔太極圖說西銘易傳序春秋傳序天下士子宜肄其文戊寅賈似道託疾辭退疏十數上上留益

堅禮異之曰師相而不名馬廷鸞泊省部臺諫學館諸司連章請留似道庚辰子憲薨庚寅詔以襄郢水陸屯戍將士隆暑露處出錢二百萬命京湖制司給賜秋七月復開州已亥更鑄印給之八月甲申瑞安府樂清縣嘉禾生詔薦士增四名壬辰詔郡縣行推排法虛加寡弱戶田租害民為甚其令各路監司詢訪亟除其弊詔精擇監司守令監司察郡守郡守察縣令置籍考覈歲終第其治狀來上癸巳以夏貴能舉職事進一秩詔似

道十日一朝九月庚戌以黃萬石為沿海制置使壬子  
台州大水冬十月丁丑遣范文虎總統殿司兩淮諸軍  
往襄樊會合備禦賜錢百五十萬犒師已卯詔台州發  
義倉米四千石并發豐儲倉米三萬石振遭水家甲申  
以陳宗禮趙順孫兼權參知政事依舊同提舉編修敕  
令經武要略閏十月己酉安吉州水免公田租四萬四  
千八十石戊午詔殿步馬諸軍貧乏陣沒孤遺者多方  
此隆寒其賜錢二十萬米萬石振之十一月丁丑嘉興

華亭兩縣水免公田租五萬一千石民田租四千八百  
一十石庚辰詔襄郢屯戍將士隆寒可閑其賜錢二百  
萬犒師己丑都統張世傑領兵江防乙未詔陳宗禮進  
一秩為資政殿學士依所請守兼參知政事致仕十二  
月戊戌陳宗禮卒贈七秩己亥詔唐全張興祖等齋蠟  
書入襄陽往復甚艱各補轉三官賜錢二千緡大元兵  
築萬山城

七年春正月乙丑子是授左衛上將軍進封建國公詔

湯漢洪天錫赴闕詔戒貪吏卒未紹興府諸暨縣湖田  
水免租二千八百石有奇三月戊寅發屯田租穀十萬  
石振和州無為鎮巢安慶諸州饑卒已日暈赤黃周匝  
己酉平江府饑發官倉米六萬石吉州饑發和糴米十  
萬石皆減直振糴丙戌詔減內外百司吏額戊子發米  
一萬石往建德府濟糴詔臨江軍宣聖四十七代孫廷  
之子孫與放國子監試夏四月辛亥免廣東提舉司鹽  
籮銀三萬兩甲寅禮部侍郎陳宜中再乞補外以顯文

閣待制出知福州兼福建路安撫使五月乙酉賜禮部進士張鎮孫以下五百二人及第出身壬辰發米二萬石詣衢州振糶六月癸巳以錢百萬銀五千兩命知嘉定府督萬壽修城浚壕繕甲兵備禦遏以韓震帶行御器械知江安州兼潼川東路安撫副使馬堃帶行御器械知咸淳府節制涪萬州臺臣劾朱善孫督綱運受贓四萬五千詔特貸死配三千里禁錮不赦乙未詔以蜀閩調度浩繁賜錢二百萬給用丙申諸暨縣大雨暴風

雷電發米振遭水家瑞州民及流徙者饑乏食發義倉  
米一萬八千石減直振糶己亥詔以陸九淵孫溥補上  
州文學己酉鎮江府轉輸米十萬石於五河新城積貯  
癸丑以隆暑給錢二百萬賜襄郢屯戍將士丙辰撫州  
黃震言本州振荒勸分前穀城縣尉饒立積米二百萬  
斛不發廩雖嘗監貸宜正遏糴之罪詔饒立削兩秩武  
岡軍居住洪天錫三辭召命詔守臣勉諭赴闕戊午紹  
興府饑振糧萬石己未兩淮五河築城具完賜名安淮

軍大元會兵圍襄陽秋七月辛未樞密院言吳信周旺  
齎蠟書入襄城往復効勞詔各補官三轉丁丑湖南轉  
運司訪求先儒張栻後人義倫以聞詔補將仕郎壬午  
四川制置使朱禊孫言夏五以來江水凡三泛溢自嘉  
而渝漂蕩城壁樓櫓圮壞又嘉定地震者再被災害為  
甚乞賜黜罷上答天譴詔不允癸未詔城五河淮東制  
置印應雷具有勞績進一秩宣勞官屬將士皆推恩八  
月壬辰朔日有食之甲午以錢三百萬遣京湖制置李

庭芝詣郢州調遣犒師丁未命沿江制置副使夏貴會  
合策應以錢二百萬隨軍給用九月乙亥顯文閣直學  
士湯漢顯文閣直學士洪天錫各五辭召命詔並升華  
文閣學士仍予祠祿己丑子累生冬十月丙申少傅嗣  
秀王與澤薨詔贈少師追封臨海郡王癸丑從政郎朱  
鑒孫進羣經要略己未詔殿步馬諸軍貧乏陣沒孤遺  
者方此隆寒其賜錢二十萬米萬石振之十一月癸亥  
詔民有以孝弟聞於鄉者守令其具名上聞將旌異勞

賜馬已已詔湯漢官一轉端明殿學士依所請致仕十二月甲午詔諸路監司循按刑獄兼從擾民御史臺申嚴覺察丙午以錢三十萬命四川制司下渠洋開州寧西鎮撫使張朝寶知司搃帥己亥淮東統領兼知鎮江府趙潛乞祠祿不允謝方叔特叙復元官職惠國公致仕辛亥初置士籍戊午詔舉廉能材堪縣令者侍從臺諫給舍各舉十人鄉監郎官各舉五人制帥監司各舉六人知州軍監各舉二人

八年春正月庚申詔朕惟崇儉必自宮禁始自今宮禁  
敢以珠翠銷金為首飾服用必罰無貸臣庶之家咸宜  
體悉工近犯者亦如景祐制必從重典又詔有虞之世  
三載考績三考黜陟幽明漢之為吏者長子孫則其遺  
意也比年吏習媿薄人懷一切計日待遷事未克究又  
望而之他吏胥狎玩竊弄官政吾民奚賴焉繼自今內  
之郎曹外之牧守以上更不數易其有治狀昭著自宜  
獎異章未子曷生己丑湯漢卒賜謚文清二月癸巳謝

方叔卒贈少師前知台州趙子寅歿無所歸特贈直秘  
閣給沒官宅一區田三百畝養其孤遺以旌廉吏丙午  
以錢二百萬給犒襄郢水陸戰戍將士三月丙子同知  
樞密院事兼權參知政事趙順孫授中大夫夏四月戊  
子知合州利路安撫張珏砌築宜勝山城五月己巳王  
爚除觀文殿學士提舉萬壽觀兼侍讀大元兵久圍襄  
樊援兵阨關險不克進詣荆襄將帥移駐新郢遣部轄  
張順張貴將死士三千人自上流夜半輕舟轉戰比明

達襄城收軍閥視失張順六月丙申皮龍榮徙衡州丁酉以章鑑為端明殿學士同簽書樞密院事同提舉經武要略以錢千萬命京湖制司糴米百萬石轉輸襄陽府積貯乙巳以家鉉翁兼權知紹興府浙東安撫提舉司事以唐震為浙西提點刑獄王爚乞寢新命不允勉諭赴闕辛亥臺臣言江西推排由結局已久舊設都官團長等虛名尚在占愬常役為害無窮又言廣東運司銀場病民詔俱罷之癸丑以錢五百萬緡命四川制司

詣湖北糴運上峽入夔米五十萬石秋七月辛未知靜江府廣西經略安撫使兼計度轉運使胡穎乞祠祿詔勅一轉依所乞宮觀八月丙戌朔日有食之辛丑詔家鉉翁赴闕丁未詔興府六邑水發米振遭水家壬子王爚辭免明堂大禮陪祠乙卯詔福建安撫陳宜中克舉厥職升寶謨閣待制九月丁卯詔洪天錫轉端明殿學士允所請致仕辛未明堂禮成祀景靈宮還遇大雨改乘道遙輦入和寧門肆赦庚辰詔以朱襍孫兼四川屯

田使乙酉洪天錫卒贈五官謚文毅冬十月己亥紹興  
府言八月一日會稽餘姚上虞諸暨蕭山五縣大水詔  
減田租有差丁未以章鑑兼權參知政事右丞相馬廷  
鸞十疏乞骸骨詔不允庚戌以秋雨水溢詔減錢塘仁  
和兩縣民田租什二會稽湖田租什三諸暨湖田租盡  
除之辛亥陳宜中兼給事中十一月乙卯右丞相馬廷  
鸞累疏乞骸骨授觀文殿學士知饒州詔以隆寒殿步  
馬司諸軍貧窶并陣沒孤遺者振以錢粟丙辰陳奕以

殿前都指揮使攝侍衛步軍司馬軍司已未馬廷鸞辭  
免知饒州乞祠祿詔允所請以觀文殿大學士鄱陽郡  
公提舉洞霄宮壬戌命阮思聰赴樞密院稟議己巳詔  
明堂禮成安南國王陳日叟陳威晃各加食邑一千戶  
賜鞭鞍馬等物十二月甲寅以葉夢鼎為少傅右丞相  
兼樞密使

九年春正月乙丑樊城破范天順牛富死之癸未詔定  
安豐統制金文彪朱文廣王文顯盛全滅河古河寃河

珉河等處戰功行賞二月甲申詔鄂州左水軍統制張  
順沒身戰陣贈寧遠軍承宣使官其二子承信郎立廟  
京湖賜額曰忠顯甲午朱襍孫撫綏備禦義不辭難敕  
書獎諭丁未以夏貴檢校少保庚戌呂文煥以襄陽府  
歸大元癸丑以朱潤寺戰功推賞來歸人馬宣沿江都  
統王喜等將士千五百七十餘人三月庚申賈似道言  
邊遽日聞請身督師以勵將帥詔不允四川制司言近  
出師成都劉整故吏羅鑑自北復還上整書橐一帙有

取江南二策其一曰先取全蜀蜀平江南可定其二曰清口桃源河淮要衝宜先城其地屯山東軍以圖進取帝覽奏亟詔淮東制司往清口擇利城築以備之葉夢鼎辭免右丞相詔不允庚午遣金吾衛上將軍阮思聰由平江鎮江及黃州行視城池凡合繕修增易者亟條奏丙子來歸人方德秀補成忠郎栗勇楊林胡巨川補保義郎劉全補承信郎戊寅賈似道始奏李庭芝表言襄帥呂文煥以城降大元己卯加督萬壽寧遠軍承宣

使職任仍舊庚辰夏貴辭免檢校少保不允壬午詔建  
機速房以革樞密院漏泄兵事稽遲邊報之弊賈似道  
累疏請身督師詔勉留夏四月詔褒襄城死節右領衛  
將軍范天順贈靜江軍承宣使右武大夫馬司統制牛  
富贈金州觀察使各官其二子承信郎賜土田金幣恤  
其家甲申汪立信權兵部尚書京湖安撫制置使知江  
陵府夔路策應使湖廣總領不許辭免以錢二百萬給  
立信開閩犒師葉夢鼎乞致仕遣官勉諭赴都堂治事

辛卯以趙潛為淮西總領兼沿江制置建康留守詔黃  
萬石赴闕壬辰詔襄陽六年之守一旦而失軍民離散  
痛切朕心今年乾會節其免集英殿宴以錢六十萬給  
沿江制置趙潛江防捍禦發已知招信軍陳巖乞祠祿  
詔曰廼者邊吏弗戒致有襄難將士頻歲暴露邊方蕩  
析離居盡傷朕心爾閩臣專征方面宜身率諸將宣揚  
國威以賞戮用命不用命爾守臣有土有民宜申儆國  
人保固封守爾諸將尚迪果毅一乃心力各以其兵敵

王所愾今朕多誥爾其悉聰明訓毋懈毋怠習於故常  
功多有厚賞爾不克用勸罰固不得私也又如中外小  
大臣僚有材識超卓明控御之宜懷攻守之略者密具  
以聞一如端拱二年制書朕當虛心以聽李庭芝乞解  
罷詔赴闕壬寅詔復置樞密院都統制副都統制各一  
員丁未以高達為寧江軍節度使湖北安撫使知峽州  
詔忠州潛藩已升咸淳府刺史王達改授高州刺史李  
庭芝辭召赴闕詔與祠己酉詔南歸人復有戰功者予

優賞楊春薛聚成陳君謨周海周興各補成忠郎蕭成  
侯喜丁甫劉鑄鄭歸各補承信郎以夏貴兼侍衛馬軍  
都指揮使庚戌詔汪立信賞罰調用悉聽便宜行事辛  
亥呂師夔言比賈似道得李庭芝書報臣叔父文煥以  
襄城降臣聞之墮越無地不能頃刻自安請以經略安  
撫轉運靜江府印委次官護之席藁俟命容臣歸省偏  
親誓當趨事赴功毀家紓難以贖門戶之愆以報君父  
之造詔不允五月乙卯以黃萬石權戶部尚書兼知臨

安府浙西安撫使四川制司朱襍孫言所部諸縣除正  
辟文臣外諸郡屬邑許令本公司不拘外縣一體選辟文  
臣以幸蜀之士民奏可丙辰知廬州呂文福言從兄文  
煥以襄陽降為其玷辱何顏以任邊寄乞放罷歸田里  
詔不允呂師夔五疏乞罷任詔赴闕丁卯申禁奸民妄  
立經會私剏菴舍以避征徭保伍容庇不覺察坐之辛  
未劉雄飛乞致仕戊寅孝感縣丞關應庚上書言邊防  
二十事詔授武當軍節度推官兼司法京湖制司量材

任使庚辰馬軍司統制王仙昔在襄樊緣戰陷陣今復來歸特與官五轉充殿前司正額統制賜錢一萬布衣林椿年等上書言邊防十數事詔諸人上書凡言請以丞相似道督視者不允餘付機速房六月刑部尚書兼給事中陳宜中言樊城之潰牛富死節尤著以職卑贈恤下范天順一階未愜輿情詔加贈富寧遠軍承宣使仍賜土田金幣恤其家前四川宣撫司參議官張夢發詣賈似道上書陳危急三策曰鎮漢江口岸曰城荆門

軍當陽界之玉泉山曰峽州宜都而下聯置堡砦以保聚流民且守且耕并圖上城築形勢賈似道不以上聞下京湖制司審度可否事竟不行成都安撫使督萬壽去冬調將士攻毀成都大城今春戰碉門五月遣統制楊國寶領兵至雅州統領趙忠領兵至眉州兩路捍禦有勞詔具將士宣力等第姓名以聞呂文福言文煥為人扶擁以襄陽降非由己心詔與李庭芝元陳異同其審覈以聞庭芝表向在京湖來歸人吳旺等備言文煥

父子降狀先納莞鑰旋獻襄城且陳策攻郢州請自為  
先鋒言人人同制司案辭可徵非敢加誣人罪詔文福  
勉力捍禦母墮家聲京湖制司言去年冬間探司總管  
劉儀盛聰總制趙鐸領精銳至均州文龍崖立砦呂文  
煥既降均城受敵知郡劉懋偕劉儀等扞禦宣勞詔懋  
升右武大夫帶行左衛大將軍仍舊職儀添差荆湖北  
路兵馬鈐轄聽添差郢州兵馬鈐轄各官三轉將士官  
兩轉左藏東庫蹇材望上書言邊事大可憂者七急當

為者五不報丙戌劉雄飛卒特贈一官戊子京湖制司  
請給器械詔內軍器庫選犀利者賜之仍贈錢百萬備  
修繕四川制置朱禊孫言月奉銀計萬兩願以犒師向  
後月免請詔常祿勿辭已丑給事中陳宜中言乞正范  
文虎不力援襄之罰詔文虎降一官依舊知安慶府安  
南國進方物特賜金五百兩帛百疋癸卯汪立信言臣  
奉命分閩延見吏民皆痛哭流涕而言襄樊之禍皆由  
范文虎及俞興父子文虎以三衙長聞難怯戰僅從薄

罰猶子天順守節不屈猶或可以少贖其愆興奴僕庸  
材器量褊淺務復私讐激成劉整之禍流毒至今其子  
大忠挾多資為父行賄且自希榮進今雖寸斬未足以  
快天下之忿乞寘重典則人心興起事功可圖詔俞大  
忠追毀出身文字除名循州拘管又言守關進義副尉  
童明襄陽破拔身來歸且嘗立功開州乞補轉四官詔  
特與官兩轉閏月卒次命殿前指揮使陳奕總統舟師  
備鄂州黃州江防發母來歸人郭珍補成忠郎張進張

春張德林向德成王全婁德王興各補承信郎丙辰朝  
散郎師顯行進注皇朝文鑑前臨安府司法梁炎午陳  
攻守之要五事不報命大理寺丞鍾蜚英點視沿江堡  
隘兵船戊辰知叙州郭漢傑言馬湖蠻王汝作鹿巫蠻  
王沐丘帥蠻兵立百餘助官軍民義阻險馬湖捍禦有  
功詔賞汝作沐丘金帛及其部兵有差叙州總管曹順  
一軍凡在戰陣者趣具立功等第來上秋七月丁亥權  
紹興府節制紫城軍義文榮鼎及將校趙居敬丁福孟

青蒲祥白貴史用羅宜王繁等九人成都之役沒於兵  
名追贈官秩仍官其子發已知達州趙章知開州鮮汝  
忠知渠州張資等復洋州戊戌張珏等復馬驥山八月  
癸丑權知均州徐鼎總管盛聽戰房州胡師峪板倉乙  
卯知房州李鑑調權竹山縣王國材統制熊權總轄馬  
宗明戰落馬坪白羊山詔有司各以勞效論賞九月辛  
巳以章鑑簽書樞密院事兼參知政事陳宜中同簽書  
樞密院事成都安撫使督萬壽城嘉定烏尤山乙未以

洪燾為浙東安撫使丙申以黃萬石為湖南安撫使冬十月己酉來歸人汪福許文政各官五轉癸丑鎮巢軍和州太平州諸將查文李文用孟浩等十一人以射湖岡萬歲嶺後港及焦湖北岸戰功咸賜爵賞癸亥雷四川制司言何炎向失洋州調知達州趙章等率諸部軍義復之七月又復洋州吳勝堡兩城權檄統轄謝益知洋州總制趙桂楫知巴州俾任責吳勝堡戰守之事至是以功來上且以二州攝事守臣請命於朝詔與正授

丁丑兩淮制置使印應雷告老進二秩致仕李庭芝兩淮安撫制置使賜錢二百萬激犒備禦十一月壬午子熾授左衛上將軍封嘉國公戊子知泰州龍龜準遣其將王大顯等捍禦水砦有功又獲俘民以還詔水步兩軍將校凡用命者賞激有差甲午以夏貴為淮西制置使兼知廬州陳奕沿江制置使兼知黃州呂文福知閤門事詔從李庭芝請分淮東西制置為兩司就命庭芝交割淮東仍兼淮西策應使乙未以夏貴為淮西安撫制

置使賜錢百萬激犒備禦李庚芝辭免淮西策應使不  
允知安豐軍陳萬以舟師自城西大澗口抵正陽城遇  
北兵力戰詔旌其勞十二月甲子以馬廷鸞為浙東安  
撫使知紹興府丙寅權參知政事章鑑再乞解機政不  
允丁丑沿江制置使所轄四郡夏秋旱澇免屯田租二  
十五萬石

十年春正月壬午城郢州漢口堡權總制施忠部將熊  
伯明知泰州龔準以天長縣東橫山秦潼湖青蒲口等

處戰功推賞戍于江萬里以疾辭職任詔依舊觀文殿大學士提舉洞霄宮乙丑以留夢炎知潭州兼湖南安撫使庚寅城郢州沌口西岸堡京湖制司言襄陽勇信中軍鈐轄吳信隨呂文煥北往今并妻子冒險來歸詔吳信赴闕制司仍存恤其家丙申江東沙圩租米以咸淳九年水災詔減什四己巳雨土二月己酉以趙順孫為福建安撫使辛酉詔諸制閫就任升除恩數其告命衣帶鞍馬閣門勿差人給賜往要厚賂以失優寵制臣

之意違者有刑三月已卯免郡縣侵負義倉米七十四  
萬八千餘石夏四月乙卯子昺授左衛上將軍進封永  
國公詔賞沿江都統王達黃侯戰黃連寺之功戊午以  
呂文福為常德辰沅澧靖五郡鎮撫使知沅州辛酉詔  
賞光州守陳岩路分李全許彥德總管何成路鈴仰子  
虎等牛市畈丁家莊戰功烏蘇蠻王詣雲南軍前納款  
大元五月丁亥以高世傑為湖北安撫副使兼知岳州  
總統出戍軍馬辛丑馬廷鸞辭免觀文殿大學士知紹

興府浙東安撫使詔不允壬寅張珏表請城馬驥虎頭  
兩山或先築其一以據險要六月戊午以銀二萬兩命  
壽春府措置邊防秋七月壬午汪立信乞致仕不允癸  
未帝崩於福寧殿遺詔太子㬎即皇帝位甲申臺臣劾  
內醫蔡幼習詔奪五秩送五百里州軍居住二子並罷  
閣門職八月己酉上大行皇帝謚曰端文明武景孝皇  
帝廟號度宗德祐元年正月壬午葬於永紹陵

贊曰宋至理宗疆宇日蹙賈似道執國命度宗繼統雖

無大失德而拱手權奸衰敝寢甚考其當時事勢非有  
雄才睿略之主豈能振起其墜緒哉厯數有歸宋祚尋  
訖亡國不於其身幸矣

宋史卷四十六

欽定四庫全書薈要卷五千六百七十五

史部

宋史卷四十七

元中書右丞相總裁托克托等修

本紀第四十七

瀛國公 二王附

瀛國公名熙度宗皇帝子也母曰全皇后咸淳七年九月己丑生於臨安府之大內九年十一月授左衛上將軍封嘉國公十年七月癸未度宗崩奉遺詔即皇帝位

於枢前年四歲謝太后臨朝稱詔甲申兄昱保康軍節度使開府儀同三司進封吉王加食邑一千戶弟昺保寧軍節度使開府儀同三司進封信王加食邑一千戶命平章賈似道依文彥博故事獨班起居丙戌上皇太后尊號曰壽和聖福太皇太后曰皇太后又詔以生日為天瑞節戊子命臨安府振贍細民辛卯以朱襍孫為京湖四川宣撫使兼知江陵府壬寅詔撫三邊將士命州郡舉遺逸除浙西安撫司兩浙轉運司臨安府

見進贊賞錢詔求言八月甲辰詔乞言於老臣江萬里  
葉夢鴻馬廷鸞留夢炎趙順孫王爚李庭芝築清河城  
以圖來上詔庭芝進一秩宣勞將士具名推賞加知郢  
州李雷應守軍器監知太平州孟之縉尚書兵部員外  
郎知江州錢真孫直寶章閣知鎮江軍洪起畏直敷文  
閣癸丑大霖雨天目山崩水涌流安吉臨安餘杭民溺  
死者亡算甲寅太皇太后以老不能御正衙命暫以慈  
元殿為後殿辛酉作度宗廟戊辰以全清夫為昭信軍

節度使謝堂檢校少保謝厘保康軍節度使馬廷鸞乞骸骨歸田里詔趣之任九月丁丑資政殿大學士光祿大夫王爚乞致仕詔不允戊寅發米振餘杭臨安兩縣水災餘杭災甚再給米二千石己卯似道乞免答拜從之辛巳覆試文武舉士人壬午覆試文武舉士人癸未大元兵大會於襄陽丙戌丞相巴延將一軍趣郢州元帥索多將一軍入淮翟招討將一軍徇荆南丁亥大元軍薄郢州戊子免被水州縣今年田租甲午初開經筵

丁酉天瑞節免徵臨安府公私房貨錢十日以金符十三  
銀符百給夏貴激賞奇功己亥試正奏名進士賜王  
龍澤以下出身有差壬寅有星見西方委曲如蚓復州  
副將翟國榮遇大元兵戰爛泥湖死之閩中旱冬十月  
丙午知達州趙章復洋州加右驍騎尉中郎將大元兵  
破渠州禮義城知州張資自殺丁未饒州布衣董聲應  
進諸史纂約兵鑑刑鑑詔聲應克史館編校文字癸丑  
上度宗謚廣西經略司權參議官邢友龍擊潮州漳州

寇破之乙卯令州縣行義田義役丁巳友龍以下諸將各轉官有差大元兵及郢州都統制張世傑力戰禦之遂去由藤湖入漢戊午郢州副都統趙文義追戰全子湖死恤其家庚申贈翟國榮復州團練使官其二子立廟復州壬戌以錢百萬給郢城屯戍將士甲子詔以明年為德祐元年乙丑以章鑑同知樞密院事兼權參知政事陳宜中簽書樞密院事兼權參知政事大元兵徇沙洋城京湖宣撫司遣總管王虎臣援之丙寅城破虎

臣與守隘官王大用皆被執熒惑犯鎮星大元兵至新城戊辰總制黃順出降己巳副總制仁寧出降都統制邊居義力戰城破赴火死知復州翟貴以城降閩中地震十一月癸酉以朱襍孫為京湖四川宣撫使丁丑命沿江制置使趙潛巡江策應賜錢百萬激賞戰功戊寅馬廷鸞力辭浙東安撫使知紹興府詔依舊觀文殿大學士提舉洞霄宮贈趙文義清遠軍節度使與其兄威武軍節度使文亮共立廟揚州賜名傳忠庚辰以陸秀

夫為淮東安撫制置司參議官壬午削諸班直溢額人  
癸未至乙酉覆試特奏名士人丙戌以王爚為左丞相  
章鑑為右丞相並兼樞密使似道自九月乞命左右丞  
相至是從之以張晏然兼京湖四川宣撫司參議官乙  
丑至庚寅覆試特奏名士人壬辰至癸巳如上覆試甲  
午括邸第戚畹及御前寺觀田令輸租丁酉加安南國  
王陳日叟寧遠功臣其子威晃奉正功臣十二月癸卯  
朔命建康府太平州池州振避兵淮民以隆寒勞賜京

湖及沿江戍守將士甲辰詔淮西四郡水旱去年屯田  
未輸之租其勿徵丁未提舉興國宮呂師夔請募兵江  
州詔知州錢真孫同募尚書省以錢米給之癸丑大元  
兵攻陽邏堡夏貴以兵力守武定軍都統制王達戰死  
乙卯大元兵夜以偏師乘雪渡青山磯丙辰都統程鵬  
飛鏗戰被重創歸郢州都統高邦憲屯馬家渡棄舟走  
被執大元兵復攻夏貴於陽邏堡都統制劉成以定海  
水軍戰死貴敗沿江縱兵大掠歸廬州朱禡孫將兵至

鄂州聞鄂兵敗夜奔江陵府己未權知漢陽軍王儀以城降呂文煥以北兵攻鄂州庚申程鵬飛及權守張晏然以城降幕僚張山翁不屈諸將欲殺之丞相巴延曰義士也釋之詔錢塘仁和兩縣民年七十至九十已上者賜帛及酒米癸亥詔似道都督諸路軍馬以步軍指揮使孫虎臣總統諸軍所辟官屬皆先命後奏詔天下勤王甲子起李芾為湖南提刑乙丑以高達為湖北制置使兼安撫知江陵府詔邊費浩繁吾民重困貴戚釋

道田連阡陌安居暇食有司覈其租稅收之贈王達清  
遠軍承宣使庚午度宗梓宮發引至浙江上瑛潮漲絕  
江潮失期日晡不至程鵬飛以北兵徇黃州知州陳奕  
遣人請降於壽昌軍李庭芝以兵勤王辛未命州郡節  
制駐戍經從兵

德祐元年春正月癸酉朔大元兵入黃州甲戌陳奕遣  
人下蘄州并招其子嚴於安東州丁丑知蘄州管景模  
遣人請降於黃州戊寅詔浙東邸第出米減價糶民壬

午葬度宗於永紹陵大元兵入蘄州癸未似道以呂師夔權刑部尚書都督府參贊軍事任中流調遣乙酉以陳宜中同知樞密院事兼參知政事呂師夔錢真孫遣人請降於蘄州丙戌大元兵徇江州知安東州陳嚴夜遁邳州降知壽昌軍胡夢麟寓治於江州丁亥自殺戊子知南康軍葉闇遣人請降於江州似道出師知德安府來興國以城降夔路安撫張起巖與其將代德攻開州復取之己丑知安慶府范文虎遣人以酒饌如江州

迎師乙未祐度宗神主於新宮以孫虎臣為寧武軍節  
度使戊戌赦京畿罪池州都統張林遣人請降於江州  
大元兵入安慶范文虎降通判夏椅仰藥死是月知達  
州鮮汝忠以城降二月癸卯似道以宋京為都督府計  
議官使大元軍中甲辰以黃萬石為江南西路制置使  
加湖北制置副使高達檢校少保庚戌大元兵入池州  
權守趙卯發自經死宋京如軍中請稱臣奉歲幣不得  
請而還辛亥贈劉成清遠軍承宣使乙卯五郡鎮撫呂

文福遣所部淮兵入衛降詔褒之丙辰詔勞賈似道命  
都督府歲舉改官如史嵩之故事已未加張起嚴福州  
觀察使弋德以下各轉五官庚申虎臣與大元兵戰於  
丁家洲敗績奔魯港夏貴不戰而去似道虎臣以單舸  
奔揚州諸軍盡潰翁應龍以都督府印奔臨安壬戌大  
元兵徇饒州知州唐震死之故相江萬里赴水死通判  
萬道同以城降沿江制置大使趙潛知鎮江府洪起畏  
知寧國府趙與可知隆興府吳益皆棄城通知和州王

喜以城降建康都統翁福出迎大元兵甲子大元兵至臨江軍民盡去知軍鮑廉死之似道上書請遷都乙丑下公卿雜議王爚言已不能與大計遂去張世傑將兵入衛臨安道饒州復取之其將謝元王海李旺袁恩呂再興皆戰死江西提刑文天祥起兵勤王丙寅以天祥為江西按撫副使知贛州趣入衛詔募兵以謝堂為兩浙鎮撫使謝至保寧軍節度使全永堅謝垕並檢校少保戊辰徵兩浙福建諸郡廂禁兵之半入衛湖南提刑

李芾以兵勤王知江陰軍鄭端棄城遁知無為軍劉權  
知太平州孟之縉皆以城降己巳大元兵攻嘉定九頂  
山都統侯興戰死以陳宜中知樞密院事兼參知政事  
曾淵子同知樞密院事兩浙安撫制置大使兼知臨安  
府文及翁簽書樞密院事倪普同簽書樞密院事召王  
爚為浙江東宣撫招撫大使使居京師以備咨訪遣  
大元國信使郝經等歸庚午加夏貴開府儀同三司令  
以所部兵入衛令長吏給經過兵民錢米一切勿征稅

應編配拘鎖人除偽造關會彊刦盜放火者餘悉縱之  
放免浙西公田逋米及諸處見監贓諸文武官在謫籍  
者並放自便與叙復改正放參親民加張珏寧遠軍節  
度使皆萬壽保康軍節度使張世傑和州防禦使令將  
兵入衛陳宜中乞誅似道詔罷似道平章都督子祠趙  
與可除名令臨安府捕案之招似道潰兵辛未右丞相  
章鑑遁三月壬申朔詔復茶鹽市舶法似道諸不恤民  
之政次第除之以公田給佃主令率其租戶為兵殿前

指揮使韓震請遷都陳宜中殺之震所部兵叛攻嘉會門射火箭至大內急發兵捕之皆散走癸酉都統徐旺榮迎大元兵入建康府鎮江統制石祖忠請降於建康命浙西提刑司準備差遣劉經戌吳江兩浙轉運司準備差遣羅林浙西安撫司參議官張濡戌獨松關山陰縣丞徐垓正將郁天興戌四安鎮起趙淮為大府寺丞戌銀樹東霸湖北安撫司計議官吳繼明政通城縣復取之執縣令以歸遣使召章鑑還朝甲戌以似道為醴

泉觀使大元兵至無錫縣知縣阮應得出戰一軍皆沒  
應得赴水死詔發兵戍吳江乙亥發兵戍獨松嶺銅嶺  
詔諭呂文煥陳奕范文虎使通和議息兵以王爚為左  
丞相兼樞密使閩中地復大震丙子下詔罪已以陳宜  
中為特進右丞相兼樞密使罷章鑑官予祠侍御史陳  
過請竄賈似道併治其黨人翁應龍等不俟報而去監  
察御史潘文卿季可乞從過所請乃命捕應龍下臨安  
府獄罷廖瑩中王庭劉良貴游汝朱浚陳伯大董樸貴

洪起畏鎮江自效丁丑知滁州王應龍以城降己卯杜  
翁應龍刺配吉陽軍命王爚陳宜中並都督諸路軍馬  
加呂文福福州觀察使庚申贈唐震華文閣待制削萬  
道同三官罷之壬午復吳潛向士璧官知常州趙與鑒  
聞兵至通常民錢峩以城降甲申大元兵至西海州安  
撫丁順降乙酉知東海州施居文乞降於西海州知平  
江府潛說友通判胡玉林鏗以城降加張世傑保康軍  
承宣使總都督府諸軍丙戌知廣德軍令狐槩以城降

徙浙西提點刑獄司於平江府張世傑遣其將閻順李  
存進軍廣德謝洪永進軍平江李山進軍常州丁亥張  
德以下各轉官有差謝元等贈十官有星二聞於中天  
頃之一星隕己丑滁人執王應龍歸於揚州殺之加呂  
文福保康軍承宣使趣入衛文福至饒州殺使者入江  
州降大元庚寅左司諫潘文卿右正言季可同知樞密  
院曾淵子兩浙轉運副使許自浙東安撫王霖龍相繼  
皆遁簽書樞密院文及翁同簽書樞密院倪普諷臺臣

勅已章未上亟出閩道知安東州孫嗣武以城降雨土  
卒卯命在京文武官並轉兩官其畔官而遁者令御史  
臺覺察以聞閩順戰安吉縣復取鳳平張濡部曲害大  
元行人嚴忠範於獨松關執廉希賢至臨安重創死壬  
辰岳州安撫高世傑軍洞庭中大元兵攻之世傑降癸  
巳攻岳州總制孟之紹以城降甲午詔褒諭張世傑閩  
順諸將各轉官有差乙未免安吉縣今年夏田租有戰  
沒者縣令丞恤之丙申顧順攻廣德軍復取之以陳合

同簽書樞密院事丁酉贈邊居義利州觀察使戊戌赦  
邊城降將罪能自拔而歸者錄之復一州者予知州復  
一縣者予知縣所部僚吏將卒及土豪立功者同賞罰  
章鑑祠官并奪宰輔恩數曾淵子削兩官奪執政恩數  
陳過陳堅徐卿孫各削兩官奪侍從恩數趙與鑒追兩  
官罰之遇赦永不收叙罷許自王霖龍令淮東制置司  
用標由庚子徙淮東總領所於江陰軍加吳繼明閣門  
宣贊舍人四月壬寅朔贈趙卯發華文閣待制貶陳過

平江府雄江軍統制洪福率衆復鎮巢軍甲辰贈江萬里太師謚文忠輟視朝二日乙巳大元兵入廣德縣知縣王汝翼與寓居官趙時晦率義兵戰斗山路分孟唐老與其二子皆死汝翼被執至建康死之王大用贈三官王虎臣贈兩官官其二子丙午大元兵破沙市城都統孟紀死之監鎮司馬夢求自經死戊申京湖宣撫朱祺孫湖北制置副使高達以江陵降京湖北路相繼皆下張起巖提兵保飛山己酉命劉師勇戍平江府辛亥

顧順諸將各轉三官孟唐老贈三官壬子以高斯得簽  
書樞密院事兼權參知政事總統張敏與大元兵戰豐  
城死之癸丑贈五官官其一子阮應得贈十官乙卯以  
福王與芮為武康寧江軍節度使判紹興府丙辰王爚  
來令如文彥博故事自朝參起居外並免拜以樞密副  
使召夏貴提兵入衛丁巳總制霍祖勝攻溧陽縣復取  
之戊午贈張資眉州防禦使侯興復州團練使己未文  
及翁僕普並削一官奪執政恩數潛說友削三官奪侍

從恩數庚申令狐槩除名配鬱林州牢城籍其家知金  
壇縣李成大率義局官舍山縣尉胡傳心陽春主簿潘  
大同濠梁主簿潘大嵩進士潘文孫潘應奎攻金壇縣  
取之鎮江統制侯岩縣尉趙嗣濱復助大元兵來戰成  
大二子及大同等皆死執成大以歸壬戌大元兵攻真  
州知州苗再成宗子趙孟錦率兵大戰於老鶴觜癸亥  
加知恩州田謹賢知播州楊邦憲並復州圍練使趣兵  
入衛有大星自心東北流入濁沒乙丑熒惑犯天江提

舉太平興國宮常林請立濟王後丁卯加李庭芝參知  
政事戊辰詔宜興溧陽民兵助戰有功特免今年田租  
江陰民被兵其租亦勿收責庚午大元兵至揚子橋揚  
州都撥發官雷大震出戰死是月常德鼎澧皆降五月  
辛未朔命宰執日赴朝堂治事旌德縣城守有功免其  
民今年田租癸酉大元兵至寧國縣知縣趙與塘出戰  
死甲戌淮安總制李宗榮知慶遠府仇子真將兵來勤  
王乙亥加苗再成濠州團練使趙孟錦揚州都統司計

議官以洪福知鎮巢軍丁丑詔趙潘統軍民船屯江陰  
劉師勇攻常州復取之執安撫戴之泰司戶趙必儉總  
管陸春戰死戊寅淮東兵馬鈐轄阮克己將兵來勤王  
加左驍騎中郎將己卯加婺州處士何基謚文定王柏  
承事郎加張珏檢校少保四川制置副使知重慶府庚  
辰贈雷大震保康軍節度使辛巳加劉師勇濠州團練  
使其將劉圭以下各轉官有差戊子贈潘大同等官餘  
有功人並轉兩官辛卯貶潛說友南安軍吳益汀州並

籍其家罷李珏送婺州籍呂文煥孟之縉陳奕范文虎  
家甲午饒信州饑令民入粟補官罷市舶分司令通判  
任舶事淮東西官兵各轉一官丙申詔張世傑張彥  
阮克已仇子真四道出兵遣使告天地宗廟社稷諸陵  
宮觀己亥勞軍吳繼明復蒲圻通城崇陽三縣加帶行  
帶御器械權知郢州令擇險為寓詔贈鮑廉直華文閣  
官其一子趙與塘直華文閣六月庚子朔日有食之既  
晝晦如夜省萬壽以嘉定及三龜九頂紫雲城降知叙

州李演將兵援嘉定府遂解歸戰羊雅江兵敗被執辛丑太皇太后詔削尊號聖福字以應天戒復魏克愚官太學生蕭規唐棣並補承信郎知嘉興府余安裕坐聞兵求去貽書朝中語涉不道削一官送徽州徐卿孫削一官貶吉州命侍從官已上各舉才堪文武者五人餘廷臣各舉三人雖在謫籍亦聽舉之丙午王應麟言開慶之禍始於丁大全請凡大全之黨在謫籍者皆勿宥從之己酉免廣德軍今年田租及諸郡縣未納綱解王

應麟繳還章鑑曾淵子錄黃言韓震為逆二人寔庇之  
且淵子庇翁應龍致有逸罰又嘗竊府庫金以遁庚戌  
命削鑑一官放歸田里淵子再削一官徙吉州誅翁應  
龍籍其家辛亥銓試甲寅留夢炎入朝王爚請相夢炎  
乞以經筵備顧問陳宜中請相夢炎乞祠詔二相母藉  
此求閒以爚為平章軍國重事一月兩赴經筵五日一  
朝宜中左丞相兼樞密使都督諸路兵夢炎左丞相兼  
樞密使都督諸路兵乙卯詔求言知叙州郭漢傑以城

降丙辰疏決在京罪人免引見戊午知瀘州梅應春以  
城降已未以李庭芝知樞密院事兼參知政事庚申知  
富順監王宗義以城降王應麟復繳還曾淵子貶吉州  
錄黃癸亥貶韶州丙寅吳繼明諸將各轉官有差丁卯  
朱襍孫除名籍其家秋七月庚午朔江西制置黃萬石  
移治撫州詔還隆興府辛未張世傑諸軍戰焦山下敗  
績甲戌徙似道居婺州廖瑩中除名貶昭州王庭除名  
貶梅州徙曾淵子雷州寧國吏楊義忠率義兵出戰死

乙亥贈武功大夫丁丑徙似道建寧府太白入東井庚  
申加知高郵軍楮一正閣門宣贊舍人知懷遠軍金之  
才帶御器械知安淮軍高福閣門祇候知泗州譚興閣  
門宣贊舍人知濠州孫立右衛大將軍賞守邊功壬午  
太白晝見詔饒州被兵令免今年田租路鈴劉用調兵  
入靖州知州康王叔之通判張起岩入殺王復靖州癸  
未拘內司局錢餉兵丙戌令權糴公田今年租每石以  
錢十貫給佃主十貫給種戶其鎮江常州江陰被兵者

勿羅庚寅謫似道為高州團練使貶循州籍其家糴浙  
西邸第寺觀田米十之三追復皮龍榮官監司郡守避  
事不即到官者令御史臺覺察以聞辛卯王爚子嗾京  
學生劉九臯等伏闕上書言宜中擅權黨似道庇趙潛  
潛說友使門客子弟交通關節其誤國將甚於似道宜  
中去遣使四輩召之皆不至謝堂乞罷兩浙鎮撫司不  
從張世傑乞濟師不報壬辰下劉九臯等臨安獄罷王  
爚為醴泉觀使癸巳以夏貴知揚州朱煥知廬州甲午

遣使召宜中還朝乙未以陳文龍同簽書樞密院事兼  
權參知政事通判婺州張鎮孫聞兵遁罷其官貶胡玉  
連州林鏗韶州並除名沿江招討大使汪立信卒丙申  
削李珏兩官貶潮州以開慶兵禍追罪史嵩之奪其謚  
戊戌遣使召宜中還朝八月己亥朔總制毛獻忠將衢  
州兵入衛辛丑疏決臨安府罪人壬寅右正言徐直方  
道加夏貴樞密副使兩淮宣撫大使李芾湖南鎮撫大  
使總制戴虎破大南砦轉三官加張起巖太府寺丞知

靖州劉用以下立功人各轉官有差大元兵駐巴陵縣  
黃沙乙巳吳繼明復平江縣戊申試大學上舍生己酉  
拘閻貴妃集慶寺賈貴妃演福寺田還安邊所庚戌劉  
師勇攻呂城破之癸丑復嘉定七司法丁巳遣使召宜  
中還朝加張世傑神龍衛四廂都指揮使總都督府諸  
兵戊午加劉師勇和州防禦使熒惑犯南斗趙淇除大  
理少卿王應麟封還錄黃言昔內外以寶玉獻似道淇  
兄弟為甚已未遂罷之甲子以文天祥為浙西江東制

置使兼知平江府乙丑揚州文武官轉兩官加吳繼明  
湖北招討使朱旺諸將各轉三官九月己巳陳宜中授  
觀文殿大學士醴泉觀使兼侍讀左司諫陳景行請令  
講官坐講陪宿直從之辛未加田謹賢福州觀察使楊  
邦憲利州觀察使趣入衛己卯陳宜中乞任海防不允  
辛巳有事於明堂赦李成大被執不屈死壬午贈五官  
丙戌命文天祥為都督府參贊官總三路兵會稽縣尉  
鄭虎臣部送似道之貶所至漳州殺之大元兵至泰州

和州孫虎臣自殺庚寅贈太尉免靖州今年田租辛卯  
徙李珏梧州乙未劉良貴再削兩官貶信州張彥與大  
兵戰敗被執以城降冬十月己亥加張世傑沿江招討  
使劉師勇福州觀察使總統出戍兵壬寅宜中來癸卯  
王牒殿災丁未以夢炎為左丞相宜中為右丞相並兼  
樞密使都督城臨安辛亥以張世傑為沿江制置副使  
兼知江陰軍兼浙西策應使丁巳太白會填星戊午領  
戶部材用常楙中書舍人王應麟請立濟王後贈夏椅

直秘閣徵紹興府處士陸應月為史館編校文字壬戌  
大元兵發建康參政阿喇哈四萬戶總管烏拉齊將右  
軍出四安鎮趣獨松關參政董文炳范文虎將左軍出  
江入江陰軍丞相巴延將中軍入常州熒惑犯壘壁陣  
癸亥張全尹玉麻士龍援常州士龍戰虞橋死全奔五  
牧朱煥至廬州貴不內煥歸復以為淮東制置副使陳  
合坐匿廖瑩中家資奪執政恩數甲子尹玉戰五牧死  
之張全不戰遁丙寅趣趙溍趙與可鄭端所募兵詔中

外官有習兵略者各以書來上是月李世修以江陰降  
十一月丁卯朔銅闕將貝寶胡岩起攻溧水死贈寶武  
翼郎岩起朝奉郎庚午以陳文龍同知樞密院事兼權  
參知政事黃鏞同簽書樞密院命諸制司各舉才堪將  
帥者十人不限偏裨士卒如不隸軍中者許投匱自薦  
辛未起居舍人曾唯辭官不允去癸酉贈尹玉濠州團  
練使麻士龍高州刺史免張全朱華臨陳退師罪丁丑  
詔被俘將士能率衆來歸者以人數補官能立功者予

節鉞諸閫以下官以所招人多寡行賞戊寅大元兵破廣德軍己卯破四安鎮正將胡明等死之召文天祥入衛辛巳曾唯削一官免太白犯房壬午大元兵至隆興府黃萬石棄撫州遁轉運判官劉樂以隆興降癸未大元兵破興化縣知縣胡拱辰自殺甲申中書舍人王應麟辭免兼給事中不允大元兵至常州招降不聽攻二日破之屠其城知州姚嵩通判陳炤都統王安節皆死劉師勇潰圍奔平江乙酉改宜興縣為南興軍禮部侍郎

郎陳景行辭官不允去丙戌贈濟王太師尚書令進封  
鎮王謐昭肅令福王與芮擇後奉祀賜田萬畝丁亥獨  
松關告急趣文天祥入衛戊子調民兵出守餘杭錢塘  
己丑獨松關破馮驥死之張濡遁鄰邑望風皆遁通判  
平江府鄭疇遁庚寅通判王矩之都統制王邦傑遣人  
迎降於常州辛卯大元兵趨撫州都統密佑逆戰於壁  
邪兵敗死之癸巳以張世傑為浙西制置副使兼知平  
江府甲午權禮部尚書王應麟遁黃萬石提兵走建昌

軍乙未左丞相夢炎遁丙申遣使召夢炎還朝賜餘杭  
武康長興縣民錢并免今年田租鄭疇降一官罷通判  
撫州施至道以城降十二月丁酉朔詔許似道歸葬以  
其祖田廬還之戊戌復趙與可為都督府參議官放李  
珏自便己亥贈王汝翼朝奉郎庚子以吳堅簽書樞密  
院事黃鏞兼權參知政事遣柳岳奉書詣大元軍中稱  
盜殺廉尚書乞班師修好癸卯以陳文龍為參知政事  
兼權知樞密院事賜謝堂同進士出身同知樞密院事

甲辰贈姚嵩龍圖閣待制其父希得贈太師陳炤直寶  
章閣馮驥集英殿修撰嘉興府告急給封櫈庫錢為兵  
備命趙與振戍縉雲縣復季可官令如龍泉縣募兵已  
已以陳景行為浙東安撫副使戍處州起方逢辰戍淳  
安縣丙午追封呂文德和義郡王丁未出安邊封櫈庫  
金付浙東諸郡為兵備大元兵入平江府起吳君耀為  
太府少卿提點臨平民兵遣使召夢炎應麟皆不至戊  
申張世傑入衛加檢校少保降詔獎諭王爚薨輟視朝

二日乙酉括臨安府州縣馬庚戌柳岳還癸丑遣宗正  
少卿陸秀夫刑部尚書夏士林兵部侍郎呂師孟使軍  
前詔呂文煥趙孟桂通好已未方興丁廣趙文禮兵皆  
敗歸庚申以柳岳為工部侍郎洪儒震為右正言使燕  
祈請大元兵破大洪山知隨州朱端履降權吏部尚書  
丁應奎左侍郎徐宗仁遁癸亥遣使召夢炎不至

德祐二年春正月丁丑朔大元兵自元年十月圍潭州  
湖南安撫兼知州李芾拒守三月大小戰數十合力盡

將破芾闔門死郡人知衡州尹穀亦舉家自焚帥司參  
議楊霆及募屬陳億孫顏應焱等皆從芾死守將吳繼  
明劉孝忠以城降寶慶降通判曾如驥死之陸秀夫等  
至大元軍中求稱姪納幣不從稱姪孫不從戊辰還太  
皇太后命用臣禮己巳嘉興守劉漢傑以城降庚午同  
簽書樞密院事黃鏞參知政事陳文龍遁以謝堂為兩  
浙鎮撫大使文天祥知臨安府金永堅浙東撫諭使辛  
未命吳堅為左丞相兼樞密使常楙參知政事日午宣

麻慈元殿文班止六人諸闕兵盡潰遣監察御史劉岊  
奉表稱臣上大元皇帝尊號曰仁明神武皇帝歲奉銀  
絹二十五萬乞存境土以奉蒸嘗癸酉左司諫陳孟虎  
監察御史孔應得遁熒惑犯木星甲戌大元兵至瑞州  
知州姚岩棄城去乙亥以賈餘慶知臨安府丙子命吉  
王昱信王昺出鎮丁丑以夏士林簽書樞密院事己卯  
加全永堅太尉參知政事常楙遁三學生誓死不去特  
與放釋褐出身以楊亮節為福州觀察使提舉吉王府

行事俞如珪為環衛官提舉信王府行事大元兵入安  
吉州知州趙良淳自經死月暈東升庚辰簽書樞密院  
夏士林遁辛巳祀太乙宮癸未升封吉王昱為益王判  
福州福建安撫大使信王昺為廣王判泉州兼判南外  
宗正事以留夢炎為江東西湖南北宣撫大使甲申大  
元兵至臯亭山遣監察御史楊應奎上傳國璽降其表  
曰宋國主臣熙謹百拜奉表言臣渺然幼冲遭家多難  
權奸似道背盟誤國至勤興師問罪臣非不能遷避以

求苟全今天命有歸臣將焉往謹奉太皇太后命削去  
帝號以兩浙福建江東西湖南二廣兩淮四川見存州  
郡悉上聖朝為宗社生靈祈哀請命伏望聖慈垂念不  
忍臣三百餘年宗社遽至隕絕曲賜存全則趙氏子孫  
世世有賴不敢弭忘是夜丞相陳宜中遁張世傑蘇劉  
義劉師勇各以所部兵去乙酉以文天祥為右丞相兼  
樞密使都督丙戌命天祥同吳堅使大元軍賜家鉉翁  
進士出身簽書樞密院事賈餘慶同簽書樞密院事知

臨安府戊子知建德軍方回知婺州劉怡知處州梁椅  
知台州楊必大皆降是月知臨江軍滕岩瞻遁二月丁  
酉朔日中有黑子相盪如鷺卵辛丑率百官拜表祥曦  
殿詔諭郡縣使降大元使者入臨安府封府庫收史館  
禮寺圖書及百司符印告敕罷官府及侍衛軍壬寅猶  
遣賈餘慶吳堅謝堂劉岊家鉉翁克祈請使是日大元  
軍軍錢塘江沙上潮三日不至三月丁丑入朝五月丙  
申朝於上都降封開府儀同三司瀛國公是月陳宜中

等立是於福州後二年四月是殂於燶洲陸秀夫等復立衛王昺後三年始平之

贊曰司馬遷論秦趙世系同出伯益夫稷契伯益其子孫皆有天下至於運祚短長亦係其功德之厚薄焉趙宋雖起於用武功成治定之後以仁傳家視秦宜有間矣然仁之敝失於弱即文之敝失於僵也中世有欲自強以革其敝用乖其方馴致棼擾建炎而後土宇分裂猶能六主百五十年而後亡豈非禮義足以維持君子

之志恩惠足以固結黎庶之心歟瀛國四歲即位而天  
兵渡江六歲而羣臣奉之入朝漢劉向言孔子論詩至  
殷士膚敏裸將於京喟然嘆曰大哉天命善不可不傳  
於後嗣是以富貴無常至哉言乎我皇元之平宋也吳  
越之民市不易肆世祖皇帝命征南之帥輒以宋祖戒  
曹彬勿殺之言訓之書曰大哉王言一哉王心我元一  
天下之本其在於茲

二王者度宗庶子也長建國公昱母淑妃楊氏季永國

公昺母修容俞氏度宗崩謝太后召賈似道等入宮議  
所立衆以為是長當立似道主立嫡乃立㬎而封是為  
吉王昺信王德祐二年正月文天祥尹臨安請以二王  
鎮閩廣不從始命二王出閣大元兵迫臨安宗親復以  
請乃徙封是為益王判福州福建安撫大使昺為廣王  
判泉州兼判南外宗正以駙馬都尉楊鎮及楊亮節俞  
如珪為提舉大元兵至臯亭山鎮等奉之走婺州丞相  
巴延入臨安遣范文虎將兵趣婺召鎮以王還鎮得報

即去曰我將就死於彼以緩追兵亮節等遂負王徒步  
匿山中七日其將張全以兵數十人始追及之遂同走  
溫州陸秀夫蘇劉義繼追及於道遣人召陳宜中於清  
澳宜中來謁復召張世傑於定海世傑亦以所部兵來  
溫之江心寺高宗南奔時嘗至是有御座在寺中衆相  
率哭座下奉是為天下兵馬都元帥昺副之乃發兵除  
吏以秀王與羣為福建察訪使兼安撫知西外宗正趙  
吉甫知南外宗正兼福建同提刑先入閩中撫吏民諭

同姓太皇太后尋遣二宦者以兵八人召王於溫宜中  
等沉其兵江中遂入閩時汀建諸州方欲從黃萬石降  
聞晃將至即閉城却使者萬石將劉俊宋彰周文英輩  
亦多來歸五月乙未朔宜中等乃立晃於福州以為宋  
主改元景炎冊楊淑妃為太后同聽政封信王昺為衛  
王宜中為左丞相兼都督李庭芝為右丞相陳文龍劉  
黻為參知政事張世傑為樞密副使陸秀夫為簽書樞  
密院事命吳浚趙溍傅卓李班翟國秀等分道出兵改

福州為安福府溫州為瑞安府郊赦是日黎明有大聲  
出府中衆皆驚仆文天祥自鎮江亡歸庚辰以為右丞  
相兼知樞密院事遣其將呂武入江淮招豪傑杜滸如  
溫州募兵廣東經略使徐直諒遣梁雄飛請降於隆興  
帥府乃假雄飛招討使使徇廣州既而直諒聞呈立命  
權通判李性道摧鋒軍將黃俊等拒雄飛於石門性道  
不戰俊戰敗奔廣州直諒棄城遁六月丙子雄飛入廣  
州諸降將皆授以官俊獨不受遂為衆所殺吳浚聚兵

于廣昌取南豐宜黃寧都三縣翟國秀取秀山傅卓至  
衢信諸縣民多應之者命文天祥為同都督七月丁酉  
進兵南劍州欲取江西是月吳浚兵敗於南豐翟國秀  
聞兵至遂引還傅卓兵敗詣江西元帥府降平章阿里  
海牙破嚴關馬暨退保靜江府八月漳州亂命陳文龍  
為閩廣宣撫使以討之甲戌秀王與羣圍婺州丙子聞  
大兵至遂解歸以王積翁為福建提刑招捕使知南劍  
州備禦上三郡黃恮為同提刑招捕使知漳州備禦下

三郡張世傑遣兵助吳浚與元帥李恒戰嶺零兵敗奔寧都興化石手軍亂九月復以陳文龍知興化軍東莞人熊飛為黃世傑守潮惠二州聞趙溍至即以兵應之攻雄飛於廣州壬寅雄飛遁熊飛遂復韶州新會令曾逢龍亦帥兵至廣州李性道出迎謁飛與逢龍執而殺之衢州守將魏福興出戰福星橋死壬子趙溍入廣州是月招討也的迷失會東省兵於福州元帥呂師夔張榮實將兵入梅嶺十月壬戌朔文天祥入江州趙溍遣

曾逢龍就熊飛禦大軍於南雄逢龍戰死熊飛奔韶州  
大軍圍韶州守將劉自立以城降飛率兵巷戰兵敗赴  
水死十有一月參政阿喇哈董文炳將兵至處州李珏  
以城降甲辰秀王與羣逆戰於瑞安觀察使李世達死  
之與羣及其弟與慮子孟備監軍趙由噶察訪使林溫  
被執皆死阿喇哈兵至建寧府執守臣趙崇鐵知邵武  
軍趙時賞知南劍州王積翁皆棄城去乙巳昱入海癸  
丑大軍至福安州知州王剛中以城降昱欲入泉州招

撫蒲壽庚有異志初壽庚提舉泉州舶司擅蕃舶利者三十年显舟至泉壽庚來謁請駐蹕張世傑不可或勸世傑留壽庚則凡海舶不令自隨世傑不從縱之歸繼而舟不足乃掠其舟并沒其貲壽庚乃怒殺諸宗室及士大夫與淮兵之在泉者显移潮州是月福興化皆降英德守臣凌彌堅徐夢得等亦降十二月辛酉朔趙溍棄廣州遁乙丑制置方興亦遁吳浚退走入瑞金戊辰蒲壽庚及知泉州田真子以城降知興化軍陳文龍嬰

城不下乙酉通判曹澄孫以城降文龍被執不屈死是  
次甲子門至元十四年正月大軍破汀關癸巳知循州  
劉興降壬寅吳浚棄瑞金遁鎮撫孔遵入瑞金文天祥  
走漳州浚尋還汀州降戊申知潮州馬發及其通判戚  
繼祖降癸丑復來歸丁巳權知梅州錢榮之以城降二  
月大軍至廣州縣人趙若岡以城降廣東諸郡皆降三  
月文天祥取梅州陳文龍從子瓊舉兵殺守將林華據  
興化軍四月文天祥取興國縣廣東制置使張鎮孫襲

廣州取之梁雄飛等棄城走韶州五月張世傑將兵取潮州文天祥提兵自梅州出江西入會昌縣淮民張德興亦起兵殺大湖縣丞王德顥據司空山攻下黃州壽昌軍丁巳遇宣慰鄭鼎戰樊口鼎墮水死六月辛酉文天祥取雩都己卯入興國縣七月遣兵取吉贛諸縣圍饒州衡山人趙璠撫州人何時皆起兵應之乙巳張世傑圍泉州遣將高日新復邵武淮兵在福州者欲殺王積翁以應世傑皆為積翁所戮江西宣慰李恒遣兵援

贛州而自將兵入興國八月文天祥諸將兵皆敗乃引  
兵即鄆瀕於永豐瀕兵亦潰已巳熒惑掩月天色赤壬  
申文天祥兵敗於興國己卯大軍破司空山張德興敗  
亡走甲申天祥至空坑兵盡潰遂挺身走循州諸將皆  
被執九月元帥索多援泉州戊申張世傑歸淺灣左丞  
達春將兵入大庾嶺參政也的迷失將兵復取邵武入  
福州十月甲辰唆都破興化軍陳瓊死之進攻潮州馬  
發拒之乃去攻惠州十月達春圍廣州庚寅張鎮孫以

城降元帥劉深以舟師攻昱於淺灣昱走秀山陳宜中入占城遂不反十二月丙子昱至井澳颶風壞舟幾溺死遂成疾旬餘諸兵士始稍稍來集死者十四五丁丑劉深追昱至七州洋執俞如珪以歸十五年正月大軍夷廣州城張世傑遣兵攻雷州不克己酉大軍克涪州執守將王明二月大軍破潮州馬發死之三月文天祥取惠州廣州都統凌震轉運判官王道夫取廣州昱欲往居占城不果遂駐碉州遣兵取雷州曾淵子自雷州

來以為參知政事廣西宣諭使四月戊辰是殂於瓊洲  
其臣號之曰端宗庚午衆又立衛王昺為主以陸秀夫  
為左丞相是月有黃龍見海中五月癸未朔改元祥興  
乙酉升瓊洲為翔龍縣遣張應科王用取雷州應科三  
戰皆不利用因降六月丁巳應科再戰雷州遂死之知  
高州李象祖降己未昺徙居崖山升廣州為翔龍府已  
已有大星東南流墜海中小星千餘隨之聲如雷數刻  
乃己巳卯都元帥張弘範李恒征崖山七月趙與珞與

謝明謝富守瓊州阿爾哈雅遣馬成旺招之與瑤率兵拒於白沙口十一月癸巳州民執與瑤以降閏月庚戌王道夫棄廣州遁壬戌凌震遁癸亥大軍入廣州十二月壬午王道夫攻廣州兵敗被執凌震兵繼至亦敗文天祥走海豐壬寅被執於五坡嶺震兵又敗於茭塘大軍破南安縣守將李梓發死之十六年正月壬戌張弘範兵至厓山庚午李恒兵亦來會世傑以舟師碇海中募結巨艦千餘艘中艤外艤貫以大索四周起樓棚如

城堞居焉其中大軍攻之艦堅不動又以舟載茅沃以  
膏脂乘風縱火焚之艦皆塗泥縛長木以拒火舟火不  
能爇二月戊寅朔世傑部將陳寶降己卯都統張達以  
夜襲大軍營亡失甚衆癸未有黑氣出山西李恒乘早  
潮退攻其北世傑以淮兵殊死戰至午潮上張弘範攻  
其南南北受敵兵士皆疲不能戰俄有一舟檣旗仆諸  
舟之檣旗遂皆仆世傑知事去乃抽精兵入中軍諸軍  
潰翟國秀及圍練使劉俊等解甲降大軍至中軍會暮

且風雨昏霧四塞咫尺不相辨世傑乃與蘇劉義斷維以十餘舟奪港而去陸秀夫走衛王舟王舟大且諸舟環結度不得出走乃負昺投海中後宮及諸臣多從死者七日浮尸出於海十餘萬人楊太后聞昺死撫膺大慟曰我忍死艱闊至此者正為趙氏一塊肉爾令無望矣遂赴海死世傑葬之海濱已而世傑亦自溺死宋遂亡

贊曰宋之亡徵已非一日歷數有歸真主御世而宋之

遺臣區區奉二王為海上之謀可謂不知天命也已然  
人臣忠於所事而至於斯其亦可悲也夫

宋史卷四十七

宋史卷四十七考證

瀛國公紀○宋史新編陳宜中等立益王昱於福州追上帝尊號曰考恭懿聖皇帝

宋史卷四十七考證

謹案卷四十六第一頁後八行詔立為皇子刊本

皇下衍太字據後文立為皇太子刪

第三十一頁前八行間難怯戰刊本間訛門據續

綱目改

卷四十七第一頁前六行咸淳七年刊本七訛六  
與下文四歲不合據度宗本紀改

第十二頁前七行令淮東制置司用標由按用標

由未詳

欽定四庫全書





總校官庶吉士臣張能照  
校對官庶吉士臣嚴福

謄錄監生臣彭希韓

財團法人佛陀教育基金會 釋淨空 敬印

